

ASO LUA, 23 IUNI 2020

Na nofoia e le Fofoga Fetalai le Nofoa i le itula e 9:09 i le taeao.

Tatalo.

FOFOGA FETALAI: Ou te faasilasila atu ua toe amatalia Tualumaga ma Galuega a le Fono Aoaofaitulafono. Malo le lagi e mama, malo foi le soifua manuia. Malo foi le faamalolosi mai i le faataunuuina o la tatou galuega e ala i lo tatou valaauina.

SAUNOAGA O MALIU

Na faasilasila e le Fofoga Fetalai le tuumalo o se tasi o tamalii sa avea ma sui usufono o le Palemene i tausaga ua mavae.

O le Tofa Hon. GAFA Ioelu Elisara sa avea ma sui usufono mo le Itumalo Faaalaalafaga o SATUPAITEA.

Na filifilia mai le Afioga Hon. GAFA Ioelu Elisara i le aso 13 Setema 1996 i le Faiga Palota Laitiiti ma sa faatautoina i le aso 29 Novema 1996.

Sa avea o ia ma sui usufono o le Palemene i le Paeaiga o le 1996-2001. Sa avea le Tofa Hon. GAFA Ioelu ma sui usufono o le Komiti Filifilia a le Palemene o le Maota i le tausaga 1997-1998. Sa avea ma Failautusi Faa-Palemene mo le Faalapotopotoga o le Malosi Faa-Eletise ma le Matagaluega o Fesootaiga i le tausaga e 1999.

Sa avea o ia ma Minisita o le Matagaluega o Falemeli ma Fesootaiga i le tausaga 1999. Ae na avea ma Minisita o le Ofisa o le Komisi o Galuega a le Malo, le Ofisa o Lafoga, ma le Matagaluega o Tiute i le tausaga 2000-2001. O ia o le sui usufono o le Vaega Faaupufai e Puipuia Aia Tatau a Tagata po o le HRPP.

Ia avea ia o Au e fai ma sui o lenei Palemene e molimoli atu ai faamaisega ma faamafanafanaga i le Itumalo pele, le Faletua ma le Nofo-a-alo aemaise le Aiga alii, ona o le Tama ua toesea i le finagalo o le Atua.

Ia ou te valaau atu ma le agaga faaaloalo i le mamalu o le Palemene ina ia tatou tutulai filemu mo se minute e tasi e faaalua ai lo tatou agaga faaaloalo mo le sui usufono ma lo tatou uso ua fai i lagi le folauga.

Na tutulai filemu le Maota mo le minute e tasi e faaalua ai lo latou faaaloalo i le sui usufono ua tuumalo.

FOFOGA FETALAI: Malo faafetai i le paia o le Palemene.

**TULAFONO TAU FAAOFI O LE FAATATAUINA O TUPE
FAAOPOPO (NU.3) 2019/2020 & TULAFONO TAU FAAOFI O LE
FAATATAUINA O TUPE 2020/2021 – felafolafoaiga faaauau i luga o
le faitauga faalua**

FOFOGA FETALAI: O le a faaauau pea felafolafoaiga i le Tulafono Tau Faaofi. Ma e tolopo Galuega a le Fono Aoaio i le aso fono ananafi ua maea ona saunoa le Minisita mo Faamasinoga ma Pulega tau Faamasinoga ma le Ofisa o le Komesina o Faiga Palota.

Ma ou te tapa ma le faaaloalo lau Afioga i le Minisita mo Aoga, Taaloga ma Aganuu i lau saunoaga e talifuaitau i mataupu sa laga e sui usufono mamalu o lenei Palemene.

Tulai mai lau Afioga i le Minisita faamolemole.

Afioga Hon LOAU SOLA KENETI SIO (Minisita mo Aoga, Taaloga ma Aganuu): Ou te faafetai atu i lau Afioga i le Fofoga Fetalai mo lou avanoa. Ou te manatu foi ua ta fia tautala e faaleo se lagona ua lagi le saafi o le tauta i lona tautaiailii i lenei taeao, ae talofa e, talofa i lota vaivai ma lota le magafagafa ua ta le maua ai se vaogagana aua ou paia ma ou mamalu Samoa o oe lava o le aomamala. Fai mai e amata mai i le taisamasama seia oo atu i le ataata o le goto ae o le la i le Alataua. Ona ou tulolo ai lea Samoa, aua ou te lagona e le mafai ona ou agatonuina ou paia ma mamalu, pe ta te tapisa sese ea ne i teia aitu o le fale tauaitu ona liua ai lea o le taisamasama i le taiuliuli. Ae ou te manatu o le a ifo tonu ia le u o le tologa. Samoa e, o oe lava o le maota e tulutuluitao ua soo ona taiao, tulou ia, tulouna lava.

Ou te faatulou i le paia i Tama ma o latou Aiga, o Aiga foi ma latou Tama, i le usoga a Tumua ma Pule, Ituau ma Alataua, Aiga i le Tai ma le Vaa o Fonoti. E faapena foi se agaga e faatulou ai i le faafofogaaga i le paia i le Faleagafulu, Sua ma le Vaifanua, o Fofu ma Aitulagi, Ituau ma Alataua, Saole ma Saleaamua ma le Launiu na Saelua. Ae a le Laau na Amotaasi, Faatuiolemotu, Tootoo o le Faleula ma upu ia te oe le Manuatele.

E faapena foi ona ou faatulou i lenei taeao i le afaigaluega tofifi a le Atua i fatafaitaulaga e fia, o e o lo o faapena ona faanonomanu aua se manuia o Samoa, nei ma e lua, o sou olo a punimatagi ma se tauupegaafa e tau i le lagi.

E faapena foi ona ou faatulou i le paia o le Malo i ona tulaga faalupe, le afio o lau Afioga i Le Ao o le Malo o Samoa, afio lau Afioga i le Sui Tofia, ae a le afio o lau Afioga i le Taitai o le Maota lau Afioga i le Palemia, le Sui Palemia, le vasega o le Kapeneta ma Sui Minisita o lea tala na atoa.

O lele foi ua maunu le tiasa i lenei tala na atoa i le afifio mai o Taitaifono o Komiti Faa-Palemene, ae a tamaitai ma alii faipule, o sui usufono filifilia o itumalo taitasi, o outou lava o lupe na faia mai le fuifui, aua upufai o si o tatou Malo.

E faatulou atu i le afio o lau Afioga i le Fofoga Fetalai, ae a le Sui Fofoga Fetalai. O lele ua e velo le tao i le maninoa ma momoli lapalapaomalo aua le Atua ma Lona finagalo, lo tatou vatapuia, ia goga la aua le afaigaluega tofifi a le Atua. Faafetai i le taulaga osi i lenei taeao. O lele foi e faalepa le paia i Ofisa Sili o Pulega ma Ofisa Lagolago i Matagaluega a le tatou Malo aemaise Faalapotopotoga Tumaoti. Malo afua ailao ua maua i lenei taeao. O lele ua tatou alafai mai i faguga lelei i le alofa ma le agalelei o lo tatou Matai.

O le a toe tomanatu i le tatou savaliga i lenei Paeaiga, ou te manatu foi o lele ua lamalama faaiu, ua toe o se aga ona maea lea o lenei 5 tausaga, peitai, e le galo Afia i si ona vao, se i o tatou matau mai lava i le amataga o lenei Paeaiga. E manatu lenei Matagaluega sa tele ma anoanoai fita ma faafitauli, ae a? O la outou tuualalo. E manatu foi e leai lava se sui usufono e le i lauga mai lona amataga seia oo mai le aso. O le a le matau? Ia, ua toaitiiti lava e na faapena ona afea lenei Matagaluega i a latou saunoaga. Ona ou manatu lea ai ua faamalieina uma le Maota i se tautua faale-auau a lenei Matagaluega. Ui o lea, se taimi, se itula ona ou oo atu lea aua mea na fesiligia e sui usufono.

Ae lelei ona ou toe faatepa i fuafuaga alualumamao ma faiga faavae a lenei Matagaluega ina ia manino le mata o le vai aua le auaunaga. O le manulauti mai le 2013 seia oo mai i le 2018 i lenei 5 tausaga ua mavae atu, sa i ai ona faafitauli, sa i ai ona luitau, sa faapena foi ona matou amanaia sa outou fautuaga na tuuina mai ina ia matimati ai le sa o le Matagaluega aua le agai i luma. O lea ua mavae atu le atuvasa lenei, o lea foi ua uma ona toe faataatitia isi faiga faavae aua le 2019 seia tau i le 2024 i le isi foi 5 tausaga. E i ai ona anoa ma ona faiga faavae ina ia mulimulitaia ai le Matagaluega ma mautinoa o lo o lelei le faataatiaga ina ia oooo i alo ma fanau.

Ia na o nai aotelega e pei ona ou fai atu, o le manulauti o le itu paepae o aoaoga ua mavae atu nei, ia mafai e fanau uma a Samoa ona aoaoina ma maua ni lumanai manuia. O aoga amata, ua tausaga o tou faatulai mai le taua o aoga amata e amata mai lava i tupe faasoa e pei ona i ai le tatou OGG po o le One Government Grant, lea ua faasafua atu mo aoga amata uma o

Samoa. O lea foi ua finauina e le Matagaluega totogi o faiaoga amata. Aisea? Leaga e tumau lava le manatu, a mauaa le faavae, e mausali foi le fale. O i le faavae o aoga amata. O aoga sauoo e faapena foi se lagona, ia tatou amanaia. O aoga ma atinae mo faiaoga, o le capacity building lea e tele ona tatou laulauvivilu ai ia ma outou fautua mai ai. O aoga faatekonolosi, e pei ona tatou matauina i lenei vaitau. Ia ona fai lea o sau tala pe a fua i ai i lenei vaitau o le faamai, fua i aoga, tele faafitauli na tulai mai. A o taitai lelei, e le solomuli, e tilotilo i luma po o le a le mea e tatau ona fai. O lea ua tatou matauina, ua leva ona taumafai mai le faatekonolosi, fetuunai muniao, fefulisai faalaaumamafa, ina ia tau lava lau o le faamoemoe ia oooo lava aua alo ma fanau. Ia ua faafetai foi i le faamai, i lau lea matau, ioe, ua lagalaga ai vaega ia, fesootaiga faaneionapo, auala televavave e faaoga i ai faiga faatekonolosi. O lea la ua matau ua aumai foi faamatalaga taua ma le anoa o ia tulaga. Ua leva ona taumafai mai e pei ona i ai le polokalame lea e pepese soo ai, o le school net mai lava i le 2014. A o lea la ua matauina le taua ma le anoa. Ae i ai lava auauna e le faapea e atoatoa, e i ai foi faiva e asa lava foi ma se maumau, e i ai ona faafitauli. A o lea la ua tatou matauina e ala la i le mea lea ua tulai mai i lo tatou atunuu, o lea ua faagasolo i ai. O fuafuaga alualumamao ia a le Matagaluega ina ia faataua fesootaiga faaneionapo, auala televavave, e momoli ai aoga i tua.

E i ai isi o sui usufono sa faapena ona talanoa mai i le le oooo o le auaunaga lea. E pei ona ou fai atu e i ai faafitauli e tulai mai, a faapea ua faaletonu masini po ua le oo foi le laina, pe le maua foi i lenei vai itu o le tatou atunuu, e faapena lava, ae o lo o taumafai lava i le mafai e mafai ai ona oooo. O lea la ua taua i le taimi lenei ma ua agai i ai tulaga faaleaoga ina ia faapena ona tatou faaogaina auala ia e momoli ai le feau. Tatou te le o ma iloa o lea e tu le loma, aua e oo mai i le taimi lenei e le i oo mai lava le faamai. Ae ou te manatu o le tatou tapenaga lea e tapena ai pe a faapena ona lutia tatou pe a oo mai le faamai.

O lea ua i ai le naunautaiga o le Matagaluega e ala i fuafuaga i le suiga o tausaga aoga o le fanau, masalo foi o lenei ua atagia. O kolisi maualuluga sa masani ona 5 o lea o le a 4. O fetuunaiga ia ina ia mafai ai ona mautinoa o lo o aoga le o o nai alo ma fanau i aoga. Aisea? E leai se mea o le a faapena ona tosotoso ai lava le aoga a le isi tamaitiiti, ae na te le mafaia le pito i luga. O le vaiga la ma le sailiiliga a le Matagaluega, ua tatau ona fai le faiga lea, e pei ona lauga ai foi le isi sui usufono. E faataua tatou vocational schools, TVET e agai i ai e latou te le mafaia luga i le higher education, po o le academic i le agai i luga. O le tausaga fou la o le a faatino ai le tulaga lea, o lea foi ua uma ma mautinoa ua aumai le faatonuga a le Kapeneta ina ua faapena malamalama lelei aua le agaiga o tatou aoga mo le lumanai.

O le Year 9, sue le SSLC i le Year 10 ona mataitu ai loa lea pe te alu i i, pe te alu i le isi itu, ae taunuu faatasi lava i luga. Ae o le a eseese mataupu po o le curriculum e aoaoina ai. Ioe, O le a faafaigofie ai foi lea i alo ma fanau ia

e masani ona tatou maua le upu lea o le drop out, ua latou le mafaia luga, a o lea la o le a ui atu i le isi pathway lea ona ai loa lea i le tatou iunivesite. E o atu lava la latou agai sao lava i TVET programs ae o le au academic ia i le isi itu ma agai ai i luga. O le tatou fesoasoani lena, ma o le mataituina lena e le Matagaluega o le agaiga o aoga a alo ma fanau. O le mea lea e i ai le taimi lenei, e sue i le Year 8, assess le Year 9, assess le Year 10, assess le Year 11, ae faatoa sue le isi suega i le Year 12. E 3 tausaga tatou te le iloa ai po o fea la e leiloa ai le tamaitiiti. O lea la ua i ai le suiga lea, sue i le Year 8, assess le Year 9, sue le Year 10, assess le Year 11, sue le Year 12, uma le aoga a le tamaitiiti ma agai ai loa i uta i le iunivesite.

Afioga Hon Faumuina Tiatia Faaolatane Liuga (Palauli le Falefa): Lau Afioga i le Fofoga Fetalai...

FOFOGA FETALAI: Ia, se i tulai mai le sui usufono mo Palauli le Falefa.

Afioga Hon Faumuina Tiatia Faaolatane Liuga: Faafetai atu i le Afioga i le Minisita, o le matua manino o lau saunoaga ina ia tuu atu le avanoa e toe sue ai le mea, leaga o lea o le a see ese ma le vaega tonu lava lea. O le vaega lea Loau ma le Matagaluega, o le matua manaia o le polokalame lea.

Ma e avatu ai lau faamalo ma lau faafetai ona ua laalaa i luma fuafuaga a lau Afioga ma ua faamaonia foi e le Kapeneta. Faamalo galue, faamalo le tauatai, ia faamanuia le Atua ia te oulua ma le Minisita Lagolago ma le Matagaluega. Ia manuia le Fono.

FOFOGA FETALAI: Malo. Se i tulai mai foi le isi faamalo. Se i tulai mai le sui usufono mo Faleata Sisifo.

Tofa Lealailepule Rimoni Aiafi (Faleata Sisifo): Lau Afioga i le Fofoga Fetalai. Lau Afioga, o au sa ou lauga i le vaega tonu lea ua oo i ai le saunoaga a le Afioga i le Minisita. O aso ia i Samoa sa sau e i ai lana Year 11, 9, 10, 11, 12, 13. O le tausaga nei la lea ua le toe i ai. O le fesili la lea i le Afioga i le Minisita, e momoli atu ai le faafetai i le vaega, o fuafuaga ua leva ona sau ai, o taimi ia o la e kolone tatou i le taimi o Niu Sila e tau faaeseese ai le faiga o mea nei, a o lea ua matua le tatou aoga ma le tatou lava system, le tatou faatinoga o tatou galuega, o le tulaga lea.

O le mea la lea e agai i ai le fesili lau Afioga ona o lea e pei e faamamafa mea o vocational, ma field trades ma mea faapena. O le faiga la lea e fai e isi atunuu, e uma loa le Year 10, o i ina e amata ai loa ona vavae tamaiti e o latou e amata.

O le isi mea lea na ou tau fesili ai i le isi vaitaimi, manatua na ou tetee mai lava i le amataga i le faatinoga o lea mea lea o le TTI ma le NUS. Pe le toe

tagai la le Afioga i le Minisita ma le Matagaluega e toe taumafai ona toe faataatiaese vaega ia e lua, a ia toe ave lava se faamamafa i mea ia o trades. Ae faafetai tele lava i lea vaega taua ona sa taua foi i lau lauga. Ma le faaaloalo lava faafetai.

FOFOGA FETALAI: Malo faafetai. Tulai mai le Minisita mo Aoga, Taaloga ma Aganuu.

Ia se i tulai mai se tasi o sui usufono mo Safata.

Afioga Leana Ronnie Posini (Safata Sisifo): Lau Afioga i le Fofoga Fetalai, faafetai tele lava. Faafetai tele lava i lau Afioga i le Minisita mo Aoga, aua ou te masalo o le tele o taimi ou te laga ai le mataupu lea tau matata eseese. O lau foi lea faitau e momoli ai le agaga faafetai tele i lau Afioga i le Minisita ua amanaia le tulaga o tatou aoga o matata eseese i tulaga ia. I lau lea matau foi lea, pei o le ala foi lea o le matou lalalaga i mataupu ia i aoga maualuluga ia, o lea ua faataatia mai. E pei foi o lea na saunoa atu le isi sui usufono, e pei o le agaga foi lea o lea ua tupu le tatou atunuu, ua manaomia lava ni tagata poto faapitoa i mea nei o agavaa mo trades. O le ala foi lea o le tau fai atu i le taimi ua sola, pe le o silasila le tatou Malo e tataua ona toe tuueseese le tatou iunivesite ma le aoga faa-matata eseese. I lau lea faitau, e ese a le agavaa o tagata e ave i ai le poto faapitoa lea, e agai pea i ai latou, e faatino mea ia tau matata eseese. Ou te masalo o le faataua foi lea mo le atinae o le tatou atunuu. Ma le agaga faaaloalo.

FOFOGA FETALAI: Ia, masalo o le a tulai mai o se mea e fia faasao ma faamalamalama ia faasao, ina ia aua ne i tosoa le tatou Fono, faamolemole. Ae ua manaia le faamanatu a le sui usufono mo Safata Sisifo, o itu lelei uma ia. Ae mo le faagasologa o le tatou galuega, ia e faapena leaga o lea e pei e foliga o le a toe saunoa sui usufono i mataupu sa laga muamua.

Tulai mai lau Afioga i le Minisita.

Afioga Hon LOAU SOLA KENETI SIO: Ia, e momoli atu foi le agaga faafetai pe afai ua outou lagona se agaga foi o taumafaiga a le Matagaluega. Ia tatou ave lea i uta ma tulimatai so tatou ai i le agai i luma. Ae faafetai i lou uso a Sui Minisita ia Leala mo le faamanatu, o lea foi ua ou tusitusia i lalo au fautuaga, atonu e alu alu aso faaoga i se isi Minisita e sau. A o au lava ia, ou te le faaogaina, na ona ou tusitusi lava ma faamaumau mo le agai i luma o le Palemene.

FOFOGA FETALAI: Ia se i toe tuu atu lava le avanoa i le sui usufono mo Faleata Sisifo.

Tofa Lealailepule Rimoni Aiafi: Lau Afioga i le Fofoga Fetalai, a tau se Minisita ma te mafuta i le ao ma le po o le Minisita lea, ou te fautua foi i ai i le ao ma le po i nei mea. Na o le tusi, tusi, tusi. Lau Afioga, ou te talitonu o nai mea na ua e galue ai i le taimi lenei o nai au tuualalo ia te oe. Faafetai Loau, malo faufautua i lou talia o lau fautuaga. Faafetai lava.

FOFOGA FETALAI: Se i tulai mai le Minisita mo Aoga.

Afioga Hon LOAU SOLA KENETI SIO: Ia, e lelei foi e vavae ai foe i lenei taimi, ae sao lelei lava si ou uso a Minisita o lo o ou faaaogaina ana fautuaga.

Saunoa le isi uso a sui usufono, pei lava o si ou uso mai Lefaga ma Faleaseela ma ia taua ai tatou tusi pasi nei a le NUS. Ia, e le na le laina, ta te matamuli e tau lea tulaga faapea e le o aloaia, ae na ona ou fautua atu i si ou uso, e leai, o la e aloaia lelei a tatou tusi pasi i atunuu mamao. E toatolu faiaoga na maua o latou avanoa i le mea foi lea o le quota, e le i tau o e tau sue mai ni o latou pemitā foi lea faigaluega, na ona fai lava o le matou tusi ave loa i aoga la fai mai e maua ai o latou avanoa. Ia o la ua faiaoga. Na momoli mai le faafetai na imeli mai nai teine ia te au ma momoli mai le faafetai o la ua maua a latou galuega e aunoa ma le tau sueina. A o faiaoga na iu mai gauta i le NUS.

Ae sao la le sui usufono, e i ai nai mataupu na vavala ai, o lea la ua faapena ona faataatia i le taatiaga lagatonu i le taimi lenei. Ua matau foi o lea sa i ai foi se tasi foi o tamalii o le tatou atunuu sa faapena ona vaaia le iunivesite, ae pei lava ou te taumate pei e sau mai le itumalo o le afioga i le sui usufono, ai o le mea lenei o lea e tau lauga ai. E ui o lea, e leai e le o le itu lenei, ou te le laulau po o ai e sao a o ai e sese, a o lea ua agai i ai le tatou iunivesite e faaoga tonu le tatou itutino lea o le SQA, Samoa Qualification Authority, o le latou lea matafaioi o le vaavaai o polokalame talafeagai po o lelei ona aoaoina i totonu o le iunivesite. O lea la ua sau le isi tamalii fou lea o le tatou atunuu le afioga i le Laau na Fausia, ia, ua vaai o ia i ai ma ua talafeagai ona ave uma polokalame i o i le SQA latou te faia le accreditation, ae le o le ave i ai na o le TVET ae tuu le higher education po o le academic i i le NUS.

O faiga foi na o lo o faapena ona mulimulitaia e atunuu uma o le lalolagi, Fiti, Ausetalia ma Niu Sila. E i ai le latou authority, o lea ua faagasolo, ae faafetai i le saunoa mai o le sui usufono. O polokalame la ia ua ave uma i o, Bachelor of Education, Certificate of Education, Diploma in Education, Foundation Certificate in Agriculture, Foundation Certificate in Science, Bachelor of Science, Bachelor of Medicine. O la ua agai uma a latou fuafuaga ina ia accredit uma e le SQA a latou polokalame. Ua uma foi ona fai le faamaoniga i le tatou Kapeneta, ua ave i ai le faatonuga ina faataunuu ia fuafuaga. Ma ua faagasolo la, ia le faatinoina o lea fuafuaga lau Afioga i le sui usufono e pei ona sa e laga.

O mea nei o totogi o Mission schools na saunoa i ai, e pei lava o le tamaitai sui usufono. O lea ua uma ona taatia faiga faavae a lo tatou Malo, e ala i le tatou fund foi lea OGG po o le One Government Grant. O aoga uma lava a ekalesia e pito i tetele lava a latou tupe la e maua. O le 60% o lea vaegatupe, e totogi ai a latou faiaoga. Ae a faapea e le lava, e taua la le finagalo o le tamaitai sui usufono, ma o le a toe tagatagai i ai lo tatou Malo, po o le a se isi fesuiaiga ona o lea ua faataatia le fund lea, e patino lava i le tulaga lea. Saunoa foi le tamaitai sui usufono.

FOFOGA FETALAI: Tulai mai le sui usufono tamaitai mo Gagaifomauga Nu 3.

Afioga Faaulusau Rosa Duffy-Stowers (Gagaifomauga Nu 3): Faafetai i lau Afioga mo le avanoa. Faafetai i lau Afioga i le Minisita mo le faamalamalamaina o le vaega lea. E pei o le agaga lea sa avatu ai le fautuaga, o lea ou te talitonu o lo o faamatuuina atu le seleni mo aoga ia a ekalesia. Ae pei o le agaga o le fautuaga pe le mafai ona toe silasila lau Afioga ma le paia o le Matagaluega, pe mafai ona taofi le tupe lea i totonu i ina, ae avatu faiaoga a ekalesia, ina ia mafai ona totogi faatasi ma faiaoga a le Malo. Ma lou faaaloalo faafetai.

FOFGA FETALAI: Tulai mai le sui usufono mo Falealili i Sisifo.

Tofa Aumua Isaia Lameko (Falealii Sisifo): Faafetai mo le avanoa. Ona o lea ua oo le Afioga i le Minisita i le mataupu lea i le One Government Grant, lea sa ou talosagaina ai pe le mafai ona tatala laititi le criteria lea e faaoga ai le tupe mo le maintenance o Aoga Tulagalua. Ina ia mafai ona faatau ai TV aua tatou aoga ia ua fai faatekonolosi faamolemole. Faafetai.

Afioga Hon LOAU SOLA KENETI SIO: Faafetai atu i le tamaitai sui usufono e tusa ai, ia o lea ua faamau i lalo. Leaga o lea ua alu le tatou Tala o le tupe, ae taua lou finagalo, atonu e tilotilo i ai mo le agai i luma. Ae manatua foi e eseese ekalesia, o le EFKS o la e tele le latou paketi, e tele lava, e totogi uma ai a latou faiaoga, e faapena foi le Metotisi, oka oka e se paketi, e totogi ai a latou faiaoga. O le Katoliko, u i u i e, e laititi, se i vaai po o fea ua ave i ai tupe a la outou lotu.

Afioga Faaulusau Rosa Duffy-Stowers: Lau Afioga i le Fofoga Fetalai, pe toe maua lava se avanoa.

FOFOGA FETALAI: Se i toe tulai mai le sui usufono.

Afioga Faaulusau Rosa Duffy-Stowers: Faafetai i lau Afioga i le Fofoga Fetalai, i tulaga e pei ona saunoa i ai le Afioga i le Minisita i paketi a ekalesia eseese, ou te talitonu e le o se matafaioi lea a le Matagaluega, pe faapei i ia paketi a ekalesia eseese, ae na o pau lava o lea, ina ia i ai se tulaga e mafai ai ona toe iloilo, ona o alo ma fanau uma nei, o fanau uma lava a Samoa o lea e aotauina i totonu o Samoa, ae o lea ua totogi na o faiaoga a le Malo, ae le totogia faiaoga a ekalesia. E nofo i ina le seleni aua le toe avea i tua, ae ia iloilo ia mafai ona totogi faiaoga, ma le faaaloalo faafetai.

FOFOGA FETALAI: Tulai mai le Taitai o le Malo,

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi (Palemia): Lau Afioga i le Fofoga Fetalai, ua le faa-tasi pe faa-lua ona laga le mataupu leni, ma o se mataupu e le o faapea e le o faataua e lo tatou Malo. O lo o fai pea ma faatalatalanoa mai lea taimi i lea taimi. Ma e taua le faatupu manatu o aoga ia a ekalesia. I le amataga mai o le Faiga Faavae lea a le Malo i le 1983, i le faaiuga o le 1983 na tapena ai le Tala o le tupe mo le 1984. Ua 36 tausaga talu ai, na faatalanoa ai se fesoasoani a le Malo, e tuu atu i aoga a ekalesia, na o ekalesia sa fuafua i ai le Malo, na o le \$50,000 na ave i le 1984. O le taimi lena o le matua faaletonu o tupe a lo tatou Malo. Na ave na o le \$50,000, tausaga 1985 \$100,000, 1986 fuafua ai foi lea o le \$150,000, ona faapena ai lava lea faaopoopo, faaopoopo, faaopoopo e tau mai i le taimi leni, ua \$18 miliona le mea lea ua faatulaga e le tatou Tala o le tupe. A o fesoasoani uma lava e fuafua e le Malo mo aoga. E faamoemoe lava i le tupe, o tatou lafoga lea e ao mai i o tatou tagata. E i ai foi la fesoasoani na aumai i Niu Sila ma Ausetalia, e fesoasoani ai i aoga. O le mea na tupu na aumai aumai aumai, te i lava ua tipi, o le tipiga la lena, o lea foi la ua tauave ai e le Malo, ma totogi o aoga foi ia tumaoti. Ae sa i ai foi lava le fesoasoani mai na taimi i aoga tumaoti.

O le manatu lea ua aumai, e toe tilotilo i ai le Malo ae taofi, e taua tele le manatu lea, taofi le toe avatu ae agai tonu atu lava i totogi o aoga. O le matua tele o le gasu lea o le a tulai mai ai. Aua foi o le seleni lea o lea e cover ai foi ma le administration ae o lea e faalagolago mai ia pulega a ekalesia e cover ai uma foi i i. O lona uiga a tipi nei, e faigofie lava ona ooti le mea lena, e faigofie lava ona faatonu loa e aumai ia totogi, ona alu atu ai lea i ina ae le o ma iloa i le taimi leni. Ou te faalogo o lea e fai le study i le taimi leni, se i toe fia tilotilo lava i mea ia o totogi. Aua e le mafai ona faia na o aoga a ekalesia, o la foi e i ai ma aoga tumaoti. O aoga ia sa alu alu alu ona faamatuu atu lea i tua, e faagaioi e Komiti. E pei la o le aoga lea a Kolisi o Samoa ma le aoga a Avele, o lea foi la ua tumaoti aoga na. A o le faavae lava sa sau ai ia le tatou atunuu i aso ua tuanai, e totogi lava e matua aoga a latou fanau. O tatou uma lava ia e i totonu o le Maota leni, sa totogi lava e

tatou matua aoga a tatou. E i ai foi taimi na tuli ai au ma le aoga, atoa le 2 vaiaso ua le talia au, ona ua tuai mai le totogi o lau aoga e ou matua. Ae sa taumafai lava nai matua e totogi, ae o le taimi la lenei, e pei ua fai ma vaavaai mai matua i le Malo. E le faitioina foi se isi e se isi, ia le tulaga lena, aisea? Ona o le toatele o le fanau, o lea e aoga i totonu o le Malo. O lea foi la e tele le fesoasoani a le Malo, e mama ai le totogi, o fanau o lo o aoga i totonu o le Malo. Ae i le tulaga la o aoga ia i tua, o la e i ai lava ni vaega foi e fulisia i le totogi e matua. O le tulaga lena o lea e ala ai ona fai ma siitia a tatou lafoga, ina ia fesoasoani mai le atunuu atoa, e aofia ai ma latou o la e o mai nei o la e tetee i le totogiina o lafoga. Leaga o le galuega lea e fai, o le galuega alofa, galuega alofa. E le o ni mea leaga lea e fai ai ia lafoga, e fesoasoani atu ina ia faasoaso tupe maua a le Malo i le va o matua e malolosi ma matua e le malolosi ae toatele fanau.

Lau Afioga i le Fofoga Fetalai, e taua le manatu o lo o aumai, ae le vaai puupuu foi la le Malo, i le na o le totogi, e vaai foi i le administration. E faapefea la ona totogi le administration o lea e tagi mai ai foi le ekalesia latou. Lau Afioga i le Fofoga Fetalai, taatia maia le galuega o lea ua aumai le faafesili. E le i soona faia foi e le faigamalo a le HRPP le fesoasoani lea i le 36 tausaga talu ai, o lea e faagasolo. E leai se fesoasoani faapenei sa faia e faigamalo i tua atu. Ou te manatua ina ua aumai le paketi lena iinei, o upu ia sa lafoai mai i le Malo. E faapefea ona taufaaoleole e le Malo ia le atunuu i lenei \$50,000 paupau. Lau Afioga i le Fofoga Fetalai, o upu na sa fai i totonu iinei. Faatu mai le Iunivesite na o le \$5, e \$5 ina ia faaolaola ai pea le mataupu, ae faaauau faatalanoaga. Sa ulagia i totonu o le Maota lenei, o le a le mea e aumai ai nei mea e pei o ni mea ula. E le faatuu se Iunivesite i se \$5. Ae o le a la le mea ua tupu. Na amata i le \$5, o lea ua tu le Iunivesite. Sa matua fai i ai faaupuga faalumaluma i totonu o le Maota lenei. Lau Afioga i le Fofoga Fetalai, tuu maia le fesili, tuu mai le fesili, lea ua tali atu le Minisita e le o faapea o laaloa ai le vaai a le Malo, o lo o tilotilo pea i ai. Ua ou le iloa pe ua faafia ona sau savali ia te au. O le ala foi lena e talanoa ai pea au ma le Minisita o le tupe, ma le Minisita foi o tupe maua, se i tilotilo ane pea i vaega ia, ina ia i ai lava se seleni ma toaga e fai le aisi, aisi faatamalii i fafo, ina ia maua mai seleni aua fanau a Samoa. Lau Afioga i le Fofoga Fetalai, o le faamalamalama lena.

FOFOGA FETALAI: Malo faafetai. O lena, e fua gaoioiga uma ma tapenaga i seleni e pei ona saunoa le Palemia. Tulai mai lau Afioga i le Minisita o Aoga.

Afioga Hon LOAU SOLA KENETI SIO: Ia, masalo ai ua malamalama lea vailiu, e pei ona fesoasoani mai foi le Palemia e faamalamalama nisi o itu, aua le afuafuaina o lenei mataupu. E le uma le fai aso o le Alii. Faagasolo le teacher council i le taimi lenei, e tasi lea vaega e pitosili ona taua o le

Matagaluega. Ua leva ona taumafai mai, ina ia faapena ona auiliili mataitu lelei ia fuafuaga a faiaoga. O lea la ua faagasolo i le taimi lenei le resitalaina o faiaoga, ina ia mautinoa, o faiaoga ia, le quality of teachers, qualified teachers, e aofia uma ai lava. O aoga a mission schools, faapea private schools ma le tatou Malo. Aisea? Ina ia maua lava le anoa o le faatinoina o le galuega. O faiaoga lelei, matua lelei, atoatoa lona lelei, aua le aotauina o alo ma fanau. O lo o faagasolo i le taimi lenei. Na saunoa foi isi sui usufono i le tulaga o faleaoga. O faleaoga lava ia, o le faigofie ia, e le faigata tele. E fai lau tusi talosaga ona momoli lea i le Ofisa o Iapani, fesoasoani atu le Matagaluega, i le supporting letter leaga o lea ou te faalogo atu i isi sui usufono, o lea lava e le i faia faleaoga, aemaise lava faleaoga Tulagalua, taatia Kolisi. Ua leva ona tatau ona fai pe a faapea o faaletonu. Ae a faapea o lea ou te matau atu pe i e foliga mai, o lou auala lea e te toe sau ai, e le afaina lea. Ae mafai ona ou fesoasoani atu. Ae aumai nei lava le tusi, e fai i le vaiaso lea lou faleaoga.

Afioga Tafua Maluelue Tafua (Aleipata Itupa i Lalo): Lau Afioga i le Fofoga Fetalai, na o si tamai mea lava sia na lavea i lau lauga, o lea ua saunoa i ai le Afioga i le Minisita.

FOFOGA FETALAI: Tulai mai le Afioga i le sui usufono mo Aleipata Itupa i lalo.

Afioga Tafua Maluelue Tafua: Faafetai mo le saunoaga mamalu a le Afioga i le Minisita. E i ai le upu foi lele mo le passing comment, o le a uma lau lauga, ae toe faatalofa atu lava i lau Afioga ma ou faamavae atu, ona ou fai atu lea, se i e alofa e fesoasoani mai o la e fai lo matou faleaoga. A o lea ou te mulimulitai i le sini autu lea na e saunoa ai. Ia aotauina uma le fanau a Samoa mo so tatou lumanai manuia. Ae ua ou tulai lau Afioga, na ala foi ona ou tuualalo atu, manaia le vaeveaga foi lea o le Year 8, Year 9, Year 10 ma le Year 11, faatoa saili loa i ina le..., e pei o le filiga lea o le a fai i ina. A o lau fesili, e manaia pe a e saunoa mai, a faafefea le vaega lea, le au slow learners vaega foi lea i tua faatoa fia aoga lava ua tai 16 tausaga 17 tausaga. Pe i ai se provision mo le vaega lena, ma le faaaloalo. Ae faafetai tele mo le faleaoga, o lea o le a ou faatali atu i se tusi, aua e pei o le agaga lena na ou talosaga atu ai. Manuia lau lauga.

Afioga Hon LOAU SOLA KENETI SIO: Faafetai i le faamanatu a le Afioga i le Tuiatua faanofonofu. E sao oe si au uo, ae o le agaga lena, o la ua fai lou faleaoga. A o e, e le i faia faleaoga lea e agai atu ai se manatu. Leaga o lea ou te faalogo atu lava, o la e le i faia le faleaoga o le isi sui usufono. O lou lena faatamala, ae o lau fesoasoani lena, vave ona aumai le tusi, fai i le vaiaso lea le faleaoga.

FOFOGA FETALAI: Tulai mai le isi sui usufono mo Falealili.

Afioga Fuimaono Teo Samuelu Teo (Falealili Sasae): Lau Afioga i le Fofoga Fetalai. Faafetai i lau Afioga i le Minisita mo le faamalamalamaina o lea vaega. E pau lava le talosaga i lau Afioga ona o le taimi nei, o la e talia e le o mautinoa lelei se aso e faataunuuna ai le faleaoga. O le talosaga foi i ina, tapenaina o se tasi foi o tulafale ua fai i lagi le folauga le tofa ia Ofoia, ma o matou tagata. O le taimi nei lea ua tuu atu i se tasi o alo o le afioga, le tamaitai o Fuimaono Tautalaaso na te faaauauina ma follow up le talosaga lea, o lena ua faamatuu atu i ai. E pau lava le tatalo, o la ua faagasolo ae manaomia lava le fesoasoani a lau Afioga i le Minisita ina ia vave ona faataunuu lea foi faamoemoe. Ma le faaaloalo lava.

Tofa Namulauulu Sami Leota (Faasaleleaga Nu.2): Lau Afioga i le Fofoga Fetalai, manu o maua lenei avanoa.

FOFOGA FETALAI: Ia se i tulai mai le sui usufono.

Tofa Namulauulu Sami Leota: E momoli le faafetai i lau Afioga i le Minisita mo le tulaga foi e i ai le avanoa e maua ai seleni e fesoasoani i le tau faiga o le matou aoga. Ae tasi lava le vaega lea lau Afioga, ona o lea foi sa faamalosi atu e le tatou Ofisa, le agai sao lava o tamaiti aoga i aoga a latou nuu. Ona o le mea lea sa tupu, e vaai atu loa ua manaia le faleaoga o le isi nuu lea tuaoi, ona agai uma loa foi i ai. O lea la i le taimi lenei i le tausaga lenei, i le matou lola, ua faamalosi foi i le pulega a le matou nuu, le agai uma i le matou faleaoga fou lea o le a fai. O lea la o le a fai, ae o le tulaga la ua i ai, pe o le amataga o le tausaga lenei, toetiiti latalata i le 100 le increase o le lola la ua i ai. Ae o le tulaga lena e i ai le grant lea sa avatu i le tatou Matagaluega, o lena e tumau lava. Na ona tagai ifo lau Afioga i ai, pe ona o le grant lena e faagasolo ai le tausaga lenei. Ae se i tagai i ai i le talosaga a lenei aoga, ona o au lea ou te peresetene ai i le matou aoga Tulagalua. Pe le ono vaavaai i ai i se avanoa e faagasolo ua toatele tamaiti, ae o la e tumau le tatou grant i lenei tausaga. Ma lou faaaloalo faafetai.

FOFOGA FETALAI: Se i tulai mai le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai, e tulai atu i mea nei o faleaoga fou. O le fesoasoani mo le fausia o faleaoga fou, o lo o lelei faagasolo. O le fesoasoani mai lea a le Malo o Iapani, ma o se mataupu faatalanoaina pea i le va o le Malo o Iapani faapea foi ma le Matagaluega o le Va-i-fafo. E faatalanoa ai ia tulaga nei o

fesoasoani mai fafo. E faapea foi ma le Matagaluega o le tupe, aemaise lava Ausetalia, Niu Sila, Iapani ma Saina ma isi Malo. O le mataupu la lea i faleaoga lau Afioga i le Fofoga Fetalai, e pau lava le polokalame lea e vave, ma tele le e fai si televave o le ioega o i, i le Malo o Iapani. E afua i le lelei o lipoti e avatu iinei i le faagasologa aemaise foi o le atunuu o Iapani, o le atunuu lea na muaimalae i le tulaga lea o le faaaoga o mea nei o aoaoga ma le faatalenia o ona tagata e atiae ai lo latou atunuu. E oo lava i le tulaga maualuga o se atunuu, e le lava ia ni resources o i ai, e leai ni oloa faalenatura. E na o le 14% lau Afioga le eleele e mafai ona faatoa ai ni mea tau faatoaga. O le tele o le atunuu na o mauga. O le isi la lenei o atunuu maoae le latou agaitonu loa e atiae ia tagata e aooga e faapopoto. Aemaise aoga ia, e tomai faapitoa e afua ai foi ona fai a tatou aoaoga ia o Matata eseese. Ia o ituaiga atunuu e o mai avatu ia oa, iron ore, mea o palapala, eleele lea e faulai ai uamea eseese ona avatu loa lea susunu ma faaliu uamea le tele o minerals e maua mai, o minerale. Ona nonofo loa lea ma fausia ia oloa maoae e tele le tupe e maua mai ai e pei o uati, mea faapena. O le mea e sili ona maoae i le vaai a atunuu i na taimi. O le tele o le iron ore lea e avatu i Ausetalia, ona susunu lea e maua mai ai le uamea, steel. Ona fau ai lea o tamai mea nei, tamai oloa nei, ae toe alu atu Ausetalia toe import mai. O ituaiga tomai lena o lea na fausia ai le tamaoiga atoa o Iapani, ma e fialia tele Iapani i le vaavaai mai o avatu a tatou talosaga. Ona o le mea lea na atiae ai Iapani, o aoaoga ina ia popoto fanau a Samoa. O le ala foi lea o lea e tele ai le tulaga fetalai, i le faataotoga o latou fesoasoani e aumai. O lea foi la, e sau ai pea, sau ai pea, sau ai pea ia fesoasoani nei. Ma o lea ou te tau to manatu nei ua tele, ua ou le iloa, o isi nuu ua amata ona uma ona fausia le faleaoga muamua, toe fau le isi faleaoga, aemaise pe a mu. E pei o Vailoa lea e le talia le Tulafono lea e avatu nei, i le taimi muamua. O lea ua ou le iloa pe ua 3 ea faleaoga o Vailoa. Fai le isi faleaoga mu, toe fai le isi faleaoga toe leaga foi, toe fai le isi faleaoga, fai e Iapani. O Fasitoo tai na lavea ai foi i le mea lena, uma ona fau le faleaoga ae toe manao e toe talepe le faleaoga e toe fau le isi faleaoga i uta. Lau Afioga i le Fofoga Fetalai, e tele le tupe lea e aumai i i. Ae pei o le isi lena mea na maua mai ai le fesoasoani o Saina. E i ai le faalavelave tele lava o Saina, e ui ina tele le tupe a latou e fuafua e fau ai se faleaoga. A o le lavelave o latou approval process i le alu i luga fai ai ia le tele o le lavelave, o auala e auala atu ai le talosaga. O lea lava e oo mai nei, o lea lava e faatali nisi a tatou ioega ua leva ona faatalanoa, ua tataua ona faagasolo ia le Kolisi lea o Leoleo, o Tafaigata o la foi ua outou silasila i ai ua uma ona faamama, ae toe lavea foi i le tulaga o le Koviti-19. O le itu la lena, ina ia silafia e mafua ai ona tuai isi faleaoga, ona o lea e faalagolago uma i i ia Iapani. Sa i ai foi isi faleaoga sa fai mai e le EU, ae ua alu foi sui a latou faiga faavae, e i ai foi faleaoga sa fai e Amerika sui foi latou faiga faavae. E pei na o Iapani lava, lea o lo o lelei pea le faasologa o latou faaiuga fai, ona o le talitonuga maumauai o le Malo lenei, o le auala lea e taua tele

ai le latou fesoasoani e aumai mo Samoa mo le agai atu i le lumanai. E ala la ona ou tulai atu, ona o le faanaunautaiga i sui o le Maota lenei i ni faleaoga fou, ae ala ona tuai ona o le faasologa o lo o alu ai le faasologa a Malo mai fafo. Leaga le mea e leaga o le mativa, ae o le mea lava lea sa tatou nonofo lava tatou ma fai. Sa tatou faia lava e tatou ia tatou lava tupe. E oo foi i si faleaoga ia na fau, aua o lea ou te matau pe na o le 300 ma ona tupu afe le mea lea e aumai e Iapani, ae uma ane ua faalava e le nuu tupe e totoe. Ae o le tulaga tele lava, o le faamama avega ae mafai lava ona fai i le \$300,000 pe afai e faaoga e le nuu latou a latou tagata faufale, ma vaavaai pea vaavaai pea ma vaavaai pea, o la e sao le fausaga ma mulimulitai i le ata na faataatia. Aua o mea foi nei o tufuga faufale, e matua afe ma afe ituaiga togafiti eseese e mafai ona latou faia, e taugofie ai le galuega, ae lamatia ai fanau a le nuu, ona o le tele o short cuts ua fai. Ma le faaogaina ai ata ua uma ona faataoto i lalo e inisinia le au tusiata. Ina ia malosi ma saogalemu le fale mo fanau a le nuu o lo o aoga ai. Lau Afioga i le Fofoga Fetalai, o le fesoasoani atu lea, ona o lea e matau i le tele o saunoaga a sui usufono, ona o lo o faatali pea a latou afioaga ia a latou faleaoga, a o lea la ua faafogafoga mai, e tele lava le manao, ae o le faalavelave ua tuai mai mea a papalagi. Lau Afioga i le Fofoga Fetalai, o le faamalamalama lena.

FOFOGA FETALAI: Malo faafetai, tulai mai lau Afioga i le Minisita. Ia lava foi le onosai i sui mamalu o lo o talosagaina o latou faleaoga.

Afioga Hon LOAU SOLA KENETI SIO: Faafetai foi i le Palemia le fesoasoani mai e faamalamalama nisi itu, aua le tulaga o mea tau faleaoga. Saunoa nisi o sui usufono ia tatou sikolasipi, lea foi na laga e, o lo o faapena foi ona mataituina. E matau foi i lenei vaitau ua eseese foi faiga ua faapena ona silasila i ai atunuu o lo o faapena ona maua mai ai fesoasoani e ala i sikolasipi o Niu Sila ma Ausetalia. E le faapea la o patino lava na o le academic e agai i ai. O la foi e mafai ona faaofi atu i ai ma TVET programmes, ia e o lo o faapena ona aotauina i trades. Aua o le taimi lenei, e te apply on line lava oe, a aumai lava e maua mai lou avanoa i o, ona fuafua lea e le Ofisa o Sikolasipi, ua le toe faia i le mea lea o le tele o ou maka ma ioe e tilotilo ai ia Niu Sila foi ma talia oe, o le vave ai foi lena ona faatino. O le mea la lea lau Afioga i le sui usufono, e le na o le academic, ae faapena foi le TVET e agai i ai. Ia vave la ona e apply manu o na e lelei ou maka, e talia ai oe i fafo, ia aua tatou Iunivesite ia ma tatou avanoa faasikolasipi.

O le mea lea na saunoa ai le sui usufono o Falealili pe mafai ona faatau sana TV? Ia o le tali, o la e mafai. Masalo pe toe lava o le tou aoga la e leai se TV ia Samoa atoa. Ioe, ua tofu TV uma lava ia Primary School. Ia ae a faapea e te alu atu e leai se fund, ia faatau e oe. Ioe, o lou lena sao, faatau e oe le TV.

O le tulaga i le SchoolNet e pei ona saunua i ai se isi a sui usufono, SchoolNet ma le SNBH, o mataupu lava ia a Olo e talanoa mai ai lava i le 2016 e tau mai i le taimi leni. E laga lava e si ou uso o Olo. Aisea? Leaga o Olo e i ai lona tomai. Ioe, e naunau lava i ai Olo i le tulaga lea, e lagalaga e Olo ia le SNBH,SNBH, SNBH, SchoolNet, SchoolNet, i tausaga uma, tausaga uma, ona aisea? E i ai lona tomai faa-technician.

E tou te matauina foi o Olo sa faigaluega i na i le malaevaalele. Ae te i ua ou talanoa atu ia Leala ae fai mai Leala, e pau lava lana mea e fai o le ki o moli o le runway o le malaevaalele. O la la e faaoga i ai le tomai. O Olo e ki ai moli o le runway i le tulaga lea. O lea la e pisapisa mai lava Olo i taimi uma.

Olo, mo lou silafia o le SchoolNet ua 8 nei tausaga po o ua savali i le 9, ua out of date. Ua ese le tulaga lea ua tatou alu i ai. O le Moodle, ioe, o le mea lena lea ua faaoga i le taimi nei. Ia po o le google, o mea uma ua faaoga i le taimi leni. Ua out of date ia lena mea e te talanoa mai ai, ua leva ona pasi ma sasae.

Tofa Olo Fiti Afoa Vaai (Salega Sasae): Lau Afioga i le Fofoga Fetalai... E leai, se ese le manaia o le saunoga a le Afioga i le Minisita, ia o se mea e faasao muamua atu, e le o au o se ki moli.

Ae o le tulaga la lea i SchoolNet ua faapea mai le Afioga i le Minisita ua out of date, ae a le mea e ala ai ona aumai umi i totonu o Tala o Tupe mea na o SchoolNet ma lipoti. O lona uiga e foliga mai e le o malamalama ia le Afioga i le Minisita i galuega la e fai e le Matagaluega.

Ia, o le tulaga foi la i le mea lea o le SNBH, se e leai e ala la ona ou lagalaga atu le vaega lea ona o le taua i a, e fesoasoani i le leai o ni faiaoga aua ua 5 tausaga o e Minisita o siofi lava faiaoga. Ae e manatua foi o lea na ou faamatala muamua atu, o le fesoasoani malosia lea na i ai o tatou leitio i aso ia. E manatua foi o tatou mea faapea i lalo o niu ma tau, o le mea lena na ou taumafai atu ai, ia a la ua i ai ia TV a Primary Schools e sao. O la e i ai TV ae o la e matamata TV ai faiaoga ma tamaiti aoga ona o le SNBH lea.

Ma le mua mulimuli o le mea lena, Loau, toetiiti oo i le \$80 miliona le tau o lea mea, e le o faaogaina. Ae manuia le lauga a lau Afioga i le Minisita.

FOFOGA FETALAI: Malo, ia tulai mai le Minisita.

Afioga Hon LOAU SOLA KENETI SIO: Ia, faafetai i si ou uso a usufono. Ia e taua lava lou lagalaga, ou te le o faapea atu la ua out of date ona le faaogaina ai lea. E pau lava le mea ua slow ua le toe agai tele i ai leaga o lea ua alu atu le internet.

E te manatua foi na lauga ananafi ia le Minisita o Fesootaiga ma ona taua ai ia tatou cable foi lea, ioe, le tele o le cable, ioe. O lena foi la ua agai foi i

ai le Matagaluega, ina ia aumai foi ma se matou uaea. Ioe, ou toe manatua ai lea...

Tofa Olo Fiti Afoa Vaai: Lau Afioga i le Fofoga Fetalai, lea la ua ou manatua atu, ua tutusa lelei lava ia le Minisita o Aoga ma le Minisita o Fesootaiga le talapepelo vae atu lava ia... talanoa mai ananafi i le tele o cable. Ua fia GBs ua fia le tele o le capacity, ae o lea lava e slow lava ia tatou computer, tatou internet. Se se i fai faalelei lua mea alii.

FOFOGA FETALAI: Ia se i tulai mai le Minisita o Fesootaiga.

Afioga Hon Afamasaga Lepuiai Rico Tupai (Minisita mo Fesootaiga, Faamatalaga ma Fesootaiga Vavave Faaneionapo): Lau Afioga i le Fofoga Fetalai, o lea sa manino lava lau folasaga i mataupu ia ananafi. E tele le cable, o la ua alu i le atoa le internet. Sei vagana fesuiaiga a le Kamupani lea sa fai nei o le Vodafone, ia o lea la ua toe sui atoa ai ia le latou equipment. Ia po o latou masini e toe faaleleia atili ai le auaunaga. Ia o le taimi la lenei, o la ua test. Ia ou te fai atu ia te outou toetiiti ane, ona outou vaai lea i le mea o le a oo ai nei.

Ia o le tulaga lea o le saosaoa, o le saosaoa. A tou toe tepa i tua i le taimi sa, ae le i oo mai le cable, e le gata e matua taugata, e matua slow lava. O le taimi la nei, ou te fai atu onosai teisi lava pe afai o lena e Vodafone ia lau telefoni. E toetiiti lava pe toe tasi pe lua, ona e vaai lea i le saosaoa o le a i ai. Ae o la e galulue lava, e le malolo, faafetai.

FOFOGA FETALAI: Malo, tulai mai le Minisita o Aoga.

Afioga Hon LOAU SOLA KENETI SIO: O lena la ua tali atu le Afioga i le Minisita, toetiiti lava. Ae ua ou taua le cable lea, leaga e taua i le matou Matagaluega, i le fesootaiga lea. Aua a faapea e free le internet i tamaiti aoga. Ia Samoa e, ua sii i luga lou tulaga. E vave le tekonoosi, vave ona atamamai, vave ona maua e tamaiti le mataupu.

Ou te faalogo atu i tua i le aualii o Leala ma Sooalo, o tomumumu lava i le Konekarate lea e faia le malaevaalele foi lea i Tiavea. Fai mai le la tala, 'big money, small airport'. E faapena foi la le cable a Saga, big cable, small usage.

Afioga Peseta Vaifou Tevagaena (Faasaleleaga Nu.4): Lau Afioga i le Fofoga Fetalai...

FOFOGA FETALAI: Ia se i...

Afioga Hon LOAU SOLA KENETI SIO: E i ai se mea o... o le aualii lea e ona le tala e le o au.

Afioga Peseta Vaifou Tevagaena: Ia se i faia se malologa a le Afioga a le Minisita, faigata leaga o lea ua...

FOFOGA FETALAI: Ia se i tulai mai Peseta.

Afioga Peseta Vaifou Tevagaena: Masalo o galo i le Minisita e faamamafa lava i lau lauga le olaga faatuatua. Leaga o oe le isi Minisita o lea ou te iloa, e lava le olaga faatuatua. Ae peitai o lea ua e saunoa mai i le tulaga lea i le malaevaalele, ia ua lelei foi, se ua leva ona ta fia tali atu i le mea lea. Ae faigata i tali atu foi faapea o la e fai le pisinisi.

Ia e le mafai o lea ua, mo le silafia e lau Afioga, ina ua faasalalau le galuega lea i Tiavea, ia o lea o le a ou tali atu. Aua e moi lava o lea e fai e lau fanau, se e leai se mea e lilo i lalo o le la. Leaga e fai ma fesili le atalii i le tama, o le mea lea pe faafefea? Pe faafefea? Ona o tatou o matua e aoai e matua fanau i lea mea ma lea mea.

O le ala foi lea na saunoa ai le Taitai o le Malo, ua uma ona faasalalau le galuega. O le galuega e le tele se galuega i le amataga, ae peitai, ua o atu le Kamupani o le a amata, ia ua i ai foi aiga i tua ua manao e toe faamaamulu. O lea e tatou vaai i le agaga o le Malo, e le o faoa e le Malo a tatou eleele. O lea na iu lava ina toe soalaupule ia le pule mamalu a Alii ma Faipule, ma toe fetuunai le mea lea ua i ai nei le malae. O le a le mea ua oo i ai?

Ou te fai atu lava, o se mea i le 6 mita le loloto, o le mea lea na tanu ai le malaevaalele. A fua mai i le tau lea pe ana leai le Kamupani lea, mai i le \$3.5 miliona i le \$11 miliona lea e sosoo, silasila la pe ana leai la le faamama avega lea?

O le tele lena o le galuega lea e saunoa soo ai le sui usufono o Faleata faapea, small airport big money, ia saga talanoa Leala e le au le malamalama o le sui usufono i le mea lea. Ioe, e tatou te o i le tetele o galuega e faatino e faapena ona mafua ai na tetele tau o galuega, ma lou faaaloalo lava lau Afioga i le Fofoga Fetalai.

FOFOGA FETALAI: Aua e te amanaia, o lena e manaia, e le i uma foi le galuega.

Afioga Hon Afamasaga Lepuiai Rico Tupai: Lau Afioga i le Fofoga Fetalai...

FOFOGA FETALAI: Ia se i tulai mai le Minisita o Fesootaiga.

Afioga Hon Afamasaga Lepuiai Rico Tupai: Lau Afioga i le Fofoga Fetalai ou te tulai atu ma le agaga faaaloalo. O lea foi e faatalasua ae o lea e alu i fafo ia le tatou faasalalauga, le mea lea o le tele o le cable ae laititi ia le faaaogaina. Ia, e laititi le faaaogaina ona e laititi ia si o tatou atunuu. Ia o lena na fofola atu ananafi ia fuafuaga mamao lea e i ai i le faaaogaina o le tatou uaea, ia ma le auala e mafai ai ona faataatitia e le Malo ia infrastructure nei po o le auivi nei e faatino ai galuega.

Ae ona o lea foi e faafofoga mai Kamupani, e tele ia mea o le alu fua a le initaneti lea na alu ai nei i tua i le taimi na nonofo ai tamaiti aoga. E i ai mea e tau o Zero Rated SIM, ave fua e fai fua mai ai meaaoga. Sa tele na faaaoga fua mai ma o la e faafofoga mai ia le tele o aoga i tua, sa faaaoga fua mai e aoga ia le Digicel ma le Vodafone, i tulaga tau aoaoga lava ia.

O lea la sei vagana lava ua fia alu i se isi mea e i ai le facebook ona faatoa totogi lea. Ae sa faaaoga fua e aoga i le taimi, ia tatou telefoni e oo mai lava i le taimi lenei o la e alu fua lava ia le faaaogaina e aoga. E pei ona saunoa le Afioga i le Minisita i le SchoolNet, e na o le 60,000 tusi aoga ma lesona lea e i totonu o le SchoolNet lea e i ai i le taimi nei. Ae o tamaiti la e faaaogaina le internet, ia o la ua o sao lava i le mea e maua ai ia le miliona ma le miliona o lesona ma... E pei o le faamalamalamaga atu lea o lea tulaga, ae o la e lava e agai lava i luma le faaaogaina, faafetai.

FOFOGA FETALAI: Malo, ou te fautua atu i sui usufono mamalu, o tatou lava e mama ai liu o vaa ia mataupu faapenei, aua e so o se mea lava e fai, e fai e le fuafua mo le taimi lenei e muta ai. Ae e fai e fuafua ia sala totoo o lea e tupu le atunuu, tupu fanau ma tulaga faapena, tupu foi pisinisi ma latou e faaaogaina ai le lumanai.

Ae afai la e tatou te faia se mea e fuafua le tele mo le taimi nei, ae faafefea taeao? Faafefea lea vaiaso pe a toe manaomia? E faapena, ae a faatagego loa ia tatou saunoaga i totonu o le Maota lenei, leaga o la e faafofoga tapuai mai Samoa. Pei e foliga mai o lea e tatou te le o manatu mamafa i le tulaga o le faatinoga o a tatou feau ma galuega.

O le mea la lea, ia o lau lea fautuaga i le Nofoa. O lea e pei... tulai mai lau Afioga i le Taitai o le Malo.

Afioga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, o le mea tonu lena lea sa ou tulai atu ai, ona o fuafuaga uma a le Malo, e mo le taimi lenei ma le agai atu i le lumanai. A fuafua loa ni a tatou fuafuaga mo le taimi lenei, o lona uiga e uma ane ona fausia aua o le tele o galuega nei e fai o le 2 i le 3 tausaga. Mo mea o projects e faaigoa o long term mo le agai i le lumanai. A fua loa la se poloketi tele, mo le taimi lenei, e uma ane ona fau ua le aoga, ua laititi. O le ala lena a oo ina fuafua fuafuaga

tetele nei, e vaai i le mamao e faaaoga ai. E le gapa mai i le 10, 20, 50, 100 tausaga ia le faaaogaina.

O le ala la lena e ala ai ona fai uma fuafuaga, ae e vaai i le lumanai lea ua saunoa i ai. E mo tatou lava ia, tatou lava ia, i le taimi mai i le taimi na faia ai le tatou tautoga e oo i le taimi e uma ai le Paeaiga lenei, lau Afioga i le Fofoga Fetalai, ua toatele fanau o le atunuu ua tai 5 tausaga le matutua, ae o isi sa tai 1 tausaga ua 6 i le taimi na fai ai le tatou tautoga. O isi sa tai 5 tausaga le matutua ua 10 tausaga, o le a la le mea e manaomia? E manaomia faleaoga, e aooga ai. E manaomia falemai, ia train ia tele fomai ma teine tausimai ia faapea foi ma faiaoga.

O lea la tatou talatalanoa faaataata lafoga, ae ia tatou manatua, e leai se atunuu ma e leai ni tagata atamamai e latou te fuafua ia se fuafuaga e mamao i luma le faaaoga ae fua i le taimi nei. E vaai uma lava mo le agai atu i le lumanai.

Lau Afioga e taua tele ia le vaega lea, faafetai ua e saunoa malamalama i ai, i le tulaga o tatou fuafuaga mamao. O le ala foi la lea o lou vaai i le tele o faitioga ia e faasaga mai i fuafuaga a le Malo, o faitioga uma lava e faasino i le taimi lenei. O le mea lena e igoa o le vaai lata mai. O le vaai papau. Ae o le vaai e vaai ai le Malo, e vaai mamao i le lumanai.

Lau Afioga o lou toe tulai atu lena leaga o lea e tatou te talatalanoa i totonu o le Maota lenei, ma faaalu i fafo ia tatou faasalalauga. Ia o le toe fesoasoani atu lena e tusa o le saunoaga a le Afioga i le Minisita.

FOFOGA FETALAI: Malo, tulai mai le Afioga i le Minisita o Aoga, e faaaauu le saunoaga. O lea ua tele ina malamalama mea sa laga e sui usufono mamalu.

Afioga Hon LOAU SOLA KENETI SIO: Faafetai i lau Afioga i le Fofoga Fetalai. E manino le mata o le vai i lea tulaga e pei ona taumafai atu. O lea foi e ma te soosoo tauau a foi ma galulue faatasi ma le Afioga i le Minisita, ia o le talosaga aua le Matagaluega ae silasila ifo, manaia ia o le ata la e i luma o le Observer pe o le Sunday Observer ea? E aumai ai uaea la e pei e taatitia mai. Ia o lea la e talanoa mai le Minisita, ia e tilotilo i ai ia aua le agai i luma o le Matagaluega o Aoga ina ia free le internet. Ia a maua loa le tulaga lea, ia ou te talitonu o le a faapena ona vave, ia le agai i luma o a tatou aoaoga. Ia e le gata o le Iunivesite, ia o itutino o le tatou Matagaluega o Aoga.

O le faleaoga lea na taua e se tasi o sui usufono i Tafaigata, ia e sao le sui usufono. O la ua amata le galuega ma o le silasila a lo tatou Malo aemaise le Matagaluega, ua tatau ma onomea ona fai se faleaoga i Tafaigata. Aisea? O lea ua agai uma atu ai foi le toatele o le tatou atunuu ia ma autovaa ai. E le faapea la ua fai ona o le itumalo o le Minisita, e leai. E le o le itu lea. Ua leva ona taatia mai fuafuaga a lo tatou Malo ma ua uma foi ona ave i luma o

le Kapeneta ma ua faamaonia mai, i le silasila a le Matagaluega aemaise o faamaumauga, ia o le matua toatele o tagata o lo tatou atunuu o lo o faapena ona aumau ai, ia aemaise ai nai o tatou uso foi ia ua relocate i uta, nai o tatou uso lea sa i Sogi, tasi lea vaega taua, e taumamao nai alo ma fanau ia ma Aoga Tulagalua aemaise o Kolisi.

O lea la ua relocate i o, ia ua faapena ona tilotilo i ai. O le a fau ai ia le tatou Kolisi, o le Primary School, ia o Aoga faa-vocational subjects foi e fai ai i uta, ia ma le ECE po o le Early Childhood Education. O lona uiga la ia ua atoa ai uma ia itutino ia o le tatou faleaoga i uta. O la ua amata ia le galuega o nei ia, faaiuga o Iulai, amata Iulai ua ae le Tulagalua. Ia o le vave lea, ioe, ina ia mafai ona o loa i ai ia alo ma fanau i uta i Tafaigata. O le mea lea ao faalogologo mai Tafaigata, o lea ua to ia lo outou matupalapala ma fai ia la outou faleaoga. Agai uma i ai Nuu, Falelauniu, o Vaitele Uta, Tafaigata, o Aleisa ma totonu i ina o le inland na e totonu i ina, e matua toatele ia tagata e faapena ona aumau ai. Ia o faamaumauga, na aumai mai o i tatou faamaumauga Ofisa o Fuainumera, o le mea la lea, o le tasi lena itu taua.

Ia o le tulaga lea e pei ona saunoa i ai se tasi o sui usufono, uso a usufono mai Safotulafai, e sao oe, o lau foi lena matau. Ioe, e pei e foliga mai e fua fuafuaga ma tupe maua leaga foi e eseese Kalena. O aoga e ae ia Ianuari, ia a o le Tala o Tupe o Iuni ia Iulai, ia ona fetuunai ai lea aua e fua le tupe o le aoga i le aofai o tamaiti aoga. Ia ae o le a toe silasila i ai le Matagaluega, tilotilo i le tulaga lea.

O le Ofisa Sili o Pulega o le Polofesa i mea tau Numera. E le umi lava ona fetuunai e lau Ofisa Sili o Pulega ae maua le mea lea e, e sao ai oe. Leaga e le faapea o le a fua le latou vaai i le numera lea, ae a'e ane le aoga ua 400 tamaiti ae o lea si tamai tupe lea e, o le mea la lea, silasila ifo ai le tatou Matagaluega i le tulaga lea.

Ia ou te manatu lau Afioga i le Fofoga Fetalai, ia ua atoa foi ia le tulaga e pei ona i ai le fuafuaga a lenei Matagaluega. Na saunoa foi ia le isi sui usufono mai Falelatai ma Samatau i le taua o le tulaga lea e tatou te i ai nei i le faaaogaina o auala televavave. O isi atunuu o la ua alu ai lava i le 3 aso aoga, ua manatu latou ua sili foi lea. O le 3 o aso aoga ae o tamaiti i tua e faaoga online ioe, i le tulaga lena.

O le slow learning lea saunoa ai le Tuiatua Faanofonofu, o le 16 tausaga e le i alu lava i se aoga, ia o le fale lava o matai, ioe. O i ina e maua ai le potu lea e seasea foi ona maua e le toatele, o le fale o matai. Ioe, o le potu lena e seasea ona maua e le toatele.

Ia ona manatu lea ua maea atu ia...

Tofa Lealailepule Rimoni Aiafi: Lau Afioga i le Fofoga Fetalai...

Afioga Hon LOAU SOLA KENETI SIO: Oi oi...

Tofa Lealailepule Rimoni Aiafi: O si vaega taua lea, o le a uma le lauga a le Afioga i le Minisita...

FOFOGA FETALAI: Ia, se i saunoa mai le sui usufono o Faleata.

Tofa Lealailepule Rimoni Aiafi: O lea o le a oo i le Minisita o Tupe. O le mea lea ou te taumafai i ai le Matagaluega o Aoga, taumafai foi lea e faasopolia le initaneti i aoga uma, o lea e i i lava i le education, ua 3 tausaga o matou taumafai mai i aoga lea e matou te i ai matou.

Lau Afioga e le faigofie le mea, e le faigofie. Ae o le mea lea e tau avatu ai le talosaga i lau Afioga, afai ua 2 tausaga, 3 tausaga o avatu le matou talosaga i le Matagaluega, e tataua ona faatupe mai e latou mea ia o faiaoga e le o se faiaoga, o le tagata faapitoa lava i mea tau IT. E matua manaomia lava e aoga nei tetele, ia se tagata IT e vaai masini nei, ma fai i le taimi e faagasolo ai aoga. E le faigofie lau Afioga, o le mea lena, leaga o lea o le a toe see ese, o matou e avatua le cable, a o lau Afioga, e manatua e tasi si vaega lea lau Afioga, o Tafaigata, o le pitonuu o Vaitele, lea sa afio ai le tupu o Faleata, e suafa ia Tafaigata. E pau foi lea o le nuu ma le aiga e i ai le suafa lea le igoa lea o Tafaigata, ma le igoa e tau o Paloa matai, e Paloaloa i tagata.

O i i la i Falelauniu sa launiu ai le taumafataga a le tupu. Ae o i i Siusega, na motu ai le sega na ola ai Samoa. Leai na ona faamalamalama i le Afioga i le sui usufono ne i te i ua galo ia ia, aua ne i galo ia ia le nuu tele, Vaitele, na amata ai mea nei, faafetai.

FOFOGA FETALAI: Malo, sa ou faapea e fai i tua le lua mataupu lena. Ae..

Afioga Hon Faumuina Tiatia Faaolatane Liuga: Lau Afioga i le Fofoga Fetalai...

FOFOGA FETALAI: Ia, se i tuu atu le avanoa i le sui usufono o Palauli le Falefa e saunoa ai, ona faamaea mai ai lea o le saunoaga a le Minisita.

Afioga Hon Faumuina Tiatia Faaolatane Liuga: Ia ou te iloa, e faafetai atu. O lea sa ou taua i lau lauga ia le tulaga o malaetaalo, e tataua ona i ai le sootaga o malae taalo ma drop outs mai aoga e le o lava se tupe i malaetaalo. Afai e na o le \$150,000 e fai ai malaetaalo, e le lava. E ala la ona ou taua lea vaega o malaetaalo, e link agai i le drop out o tamaiti mai aoga. Leaga e tasi lea vaega, o le tulaga o le faia o malaetaalo o lo o matauina le tele o tagata taaalo o le Manu Samoa mai i lou itumalo ae leai se malaetaalo o i ai. E faaoga lalo o niu. O le ala lea na ou tatalo ai, e taumafai e fai se polokalame, lea ua ave le \$6 miliona e faia ai polokalame mo drop out e develop ai, ae e

tatau foi la ona faamaea ai malaetaalo, e faaoga lava e le vaega lea ma lou faaaloalo.

FOFOGA FETALAI: Malo, faafetai lava. Ia, se i tulai mai le Minisita e toe pau lea o mataupu e te saunoa ai.

Afioga Hon LOAU SOLA KENETI SIO: Faafetai i lau Afioga i le Fofoga Fetalai, saunoa foi le sui usufono mai Faleata, ia o lona lava lea finagalo. Ia o Samoa ua uma ona tofi, ioe, ae o le a ou le autalatalaina lea tulaga.

Ae o le mea lea e saunoa i ai le sui usufono mai Palauli le Falefa, e sao lelei oe si ou tama. Ioe, ia ae le na o se lakapi se taaloga. O le a le mea e le sui ai se isi tou taaloga? O se aloga paopao, e tasi lena taaloga aua leaga o le Olympic Games le taaloga lena. E tau le manaomia ai ni malae. Ioe, se i silasila ane i ai. Ne i te i ua e naunau i le lakapi, ae e leai lava ma se isi e sau mai o i lou itumalo. Ui o lea, o lea o le a faamauina i lalo lou finagalo.

Afioga Hon Faumuina Tiatia Faaolatane Liuga: Lau Afioga i le Fofoga Fetalai, e le na o le lakapi na ou taua i lau lauga. O le soka, o le kilikiti, e tou te silafia foi o le kilikiti, ua faafia ona matou taaalo ma le au a le Minisita e le taitai ona malo i le Tanifa o le Vao, e na o le toilalo. Fai mai e aumai i Faleula, ae na faiaina foi i Faleula, i le malae o le Afioga i le Minisita.

E sao, o le aoga foi o malaetaalo, e faamalositino ai o tatou tagata, i nuu i tua, ma lou faaaloalo lava, faafetai.

FOFOGA FETALAI: Ia, se i...

Afioga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai...

FOFOGA FETALAI: Tulai mai le Palemia.

Afioga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai e taua tele mea ia o malaetaalo. Leaga e o lua lava le taaalo ma aoga. Ma o le mea lava e mautinoa, o le tamaitiiti e fiafia e taaalo, e tatau foi ona lelei le aoga.

O le polokalame lea e le o se polokalame e fou. O le polokalame ua leva, ae e taua tele e faatupu manatu mo le agai i le lumanai. Ae e pei lava o mea uma e fua i le tatou seleni. Ae e lelei ona faamau ifo, e taua ia le fautuaga a le sui usufono. O lea foi e matou te faamaumauina.

E pau lava le mea ua ou tau faaletonu ai, ona o le faataitaiga na aumai e le sui usufono, e maua lava tagata taaalo lelei ae taaalo i lalo o niu. E pei e foliga mai ai, e na o lalo lava o niu e tatau loa ona taaalo ai loa le vaega o e lakapi. Ae ou te lagona, e pei se mea mao a le toeaina, ae taua lava le mataupu e le o se mataupu e fou, ae o le mataupu na avea o se tasi o polokalame e malosi a le Faigamalo leni. Ae lelei ona toe asiasi i ai. E ala la ona tau alualu ma tau faatagitoia mea nei, mea lelei ona o le tulaga lava tau seleni.

FOFOGA FETALAI: Tulai mai le... ia se i tulai mai lava le Minisita o Fesootaiga.

Afioga Hon Afamasaga Lepui ai Rico Tupai: Lau Afioga i le Fofoga Fetalai, ou te fia tali atu i le tulaga sa fesiligia e le Afioga i le sui usufono ia Lealailepule, o le tulaga lea i ai latou e atamamai faapitoa e fesoasoani i aoga tau atamai IT.

O lea e i ai faigapaaga a le Matagaluega tau Fesootaiga ma le Ofisa o Aoga ma lo tatou Asosi IT Samoa, Samoa IT Association o le SITA. O lea la na outou silasila i ai lea na tatala mai ia le faiga o faatuina o polokalame mo aoga i Avele, tatala mai Savaii ma isi aoga, ae o le aoga muamua lava lea sa agai i ai le faigapaaga leni e faatu ai le polokalame leni ma aoao faiaoga e faatino aoga i luga o fesootaiga faainitaneti, o le Kolisi o Samoa. Ae e o atu e teena mai e le Pule.

Ia o le mea la lea lau Afioga i le Fofoga Fetalai ma le mamalu o le Maota, o lea e galulue faatasi, ma e faigata a o tatou talitali ai nisi mai fafo, ae o lea lava ua i ai le atamai i Samoa nei. Ae o lea e avatu fua le fesoasoani e tauala atu i le Asosi, mo aoga aua tamaiti, ia ma aoao ai ma faiaoga. Ia..

Afioga Sulamanaia Fetiaia Tauiliili Tuivasa (Vaimauga Sasae): Lau Afioga i le Fofoga Fetalai pe maua se avanoa? Lau Afioga i le Fofoga Fetalai, e matau atu o leni taeao...

FOFOGA FETALAI: Masalo ua manino le vailiu lea e a foi, e tulai mai ai le Minisita o Fesootaiga, ae faamalulu atu...

Tofa Lealailepule Rimoni Aiafi: Lau Afioga i le Fofoga Fetalai...

FOFOGA FETALAI: O lea ua maua le tulaga e i ai, ae o oulua foi e galulue faatasi, o lau Minisita lea na saunoa, e fetuunai lava e oulua le..

Tofa Lealailepule Rimoni Aiafi: Lau Afioga, ioe faamolemole leaga o lea na taua le Pule o le Kolisi. Ia manatua, ia e ese lava ma le va i le Palemene o ia o le Minisita, a oo i le Kolisi o Samoa, e faalogo le Minisita i le

Peresetene o le Kolisi o Samoa. Ioe, o le Pule foi la, e i lalo o le Peresetene, vaeane le tamaitai Pule, ne i te i ua sese le faamatalaga na aumai, e le teena e matou. E o atu le Ofisa o Aoga ma le latou vaega lea, ua leva ona foi mai ai matou lau Afioga.

O le ala na fetuunai, se faiga talafeagai e le faigofie le mea. O le tulaga foi lea i le SITA, e part time faigaluega tagata, ae o lea e manaomia e Aoga se tagata e full time ai i i. O le mea la lea o le tuualalo i lau Afioga i le Minisita ma le Minisita o Aoga, e i ai foi taimi e te lua amanaia ai sau fai atu. Ioe ma le faaaloalo lava.

FOFOGA FETALAI: Malo, e i ai le upu foi lea e.. o le mea tatau le tagata e ave i ai le faaaloalo. Ioe, i le tulaga lava o le va faalemalo ma tulaga faapena o Pule Aoga, ia e faapena. E ave le faaaloalo i le e tatau ona ave i ai le faaaloalo o le Minisita. E faamanatu atu i Sosaiete ma... se i tulai mai le sui usufono lea o Vaimauga.

Afioga Sulamanaia Fetaiai Tauilili Tuivasa: Lau Afioga i le Fofoga Fetalai, ua ava atu foi i lenei taeao, e matau foi le mataupu a le Minisita ma lana Minisita Lagolago ia e pei lava ona e malele foi e faia i tua. Ia e pei e ta te alofa i si Minisita aua e le o iloa e le Minisita, o la e alu lava lana Minisita Lagolago ma talai o ia o le Minisita. Ae o le tulaga i le mataupu a lenei itumalo, leaga o lea ua oo i le... o lea o le a see ese le Minisita, na pau lava lea o le Minisita o Aoga a saunoa lava e faamalieina lava lenei itumalo, ona o se Minisita e talia le tuualalo. Ae le gata foi i lea, e tautala sao lava ia i tulaga i tuuaiga i lana Matagaluega, e le mafai lava ona alo. E faamalieina ai lava lou sui usufono. Ae pei o lea ua oo i malae taalo lea na taua e le sui usufono lenei le malae taalo faamolemole. E te silafia o lenei nuu o Fagalii ua uma ona fai le tatou faleaoga ae leai se malae taalo. E pei o lea ua e lilifa i isi ae se i e vaai mai i le ta nuu, leaga o oe o lou uso e pei la o le tulaga lena. Se i toe faamanatu atu, o la e avanoa le malae vaalele. Pei o le tulaga lena e i ai o le mea lena e faaoga i ai lou tulai mai i le tatou nuu, leaga tatou te le tau talanoa atu, leaga o oe o le uso faaletulafono. E tatau la ona e faia mea a le afioaga lenei meamanu o lea e te tulai mai.

E le o po se lilo sa avatu le tulaga i le Samoa Land i fanua e agai i ai si o matou nuu o Fagalii e fai ai le tulaga lea o le faleaoga, ae avatu o lalo o le vanu. O le ala lea ua toe faatino lava le faleaoga i si tamai vaega lea e i ai, ae leai la se malae taalo. O la e la ua maea le faleaoga, ae leai se mea e tua i ai lenei afioaga i se malae taalo. O lea la ua ou tatalo atu i lau Afioga i le Minisita, toe lagolago mai le ta talosaga, o la e tele le malae vaalele e vaelua i ai le malae vaalele e fai ai se tatou malae taalo. Ia ma lou faaaloalo lava i lau Afioga i le Fofoga Fetalai.

FOFOGA FETALAI: Malo faafetai. Ia, alofa lau Afioga i le Minisita se i faamau ifo i lalo le talosaga a le sui usufono mo Vaimauga Sasae.

Afioga Hon LOAU SOLA KENETI SIO: Ia, faafetai i lau Afioga i le Fofoga Fetalai, o lea foi ua maua e le Maota nei fautuaga. Ioe, o lo o faamaumau uma lava i lalo. Ia, le sui usufono mo Vaimauga Sasae, ia e sao oe, ua galo ia te au o si ou tuafafine lea ma te nonofo. Faafetai ua tau lo outou gafa i le niusina. E ui o lea, e sao, tasi lenei afioaga e leai se malae taalo e laitiiti lava, a o tamaiti foi nei, e agai lava latou i le malae tapolo, tasi lea taaloga o lo o lauiloa ai foi si o tatou atunuu ma maua ai a tatou pine auro. O le mea lea lau susuga i le sui usufono, e lelei ona e alu e te faataitai i le tapolo, ioe, e te maua uma ai i ina le au palota a Fagalii, o lo o agai i ai alo ma fanau foi a Fagalii e fiafia lava latou i le tapolo. Ae tatau foi ona silasila i le tulaga lea e fai se malae, vaai le pito lava i o i le malae vaalele, o lea ua ou faataga tou te o tou te taaalo ai. Ia, ae vaai le taavale a leoleo lena e folo atu ai i tua, leaga o lea e pule ai le Minisita o Leoleo. O lona uiga, e taalo ma poto e oso i le taimi e alu atu ai le taavale.

FOFOGA FETALAI: Ia, faaiu maia le saunoaga a lau Afioga.

Afioga Hon LOAU SOLA KENETI SIO: Ia ona faaiu atu ai lea o se manatu vaivai lau Afioga i le Fofoga Fetalai. Ae le i faauma se tala, ia malu ave i fale i o outou finagalo se faaupuga ua le tautamalii, a o le a foi se auaunaga ua le oooo, ia e le uma le faiaso o le Alii. O lau faiga faavae lea e i ai o le 2019-2024, ae talofa e, e uma nei i le 2021 lo tatou ola, ioe, talosia ia tatou toe foi uma mai e faaauau ai le faiga faavae lea e ia te au.

O le mea lea lau Afioga i le Fofoga Fetalai ae ou te le i nofo i lalo, e ao lava ona oo sau faamatalaga i le tapuaiga a si ou itumalo. Talofa e ia Sagaga le Falefa o le a tatou faamavae, leaga o lea ua vavae matou, ioe, o le a motu mai au i Fogaa aua foi Aiga e Tolu i le la itu. O le mea lea, ia, mai lava i Niuvai seia paia Fogaa i la outou tapuaiga, faafetai tele fai tatalo. E manatu foi e le asa lava se faiva ma se maumau. O la outou tapuaiga o lea sa outou tui le mulipapaga ma po le fala ma feula le mulila a o alofaiva foi aua tiute ma faiva ua tofofi ai. O le mea lea le paia i Aiga e Tolu, Lutatua ma lou Gautaala, le mamalu foi i le Faletolu, o le a sa outou matau i le auaunaga a lo outou sui usufono, ia, e poto lava le tautai ae i ai lava le taimi e le mafai ai ona tatai le i'a i lona sa. E faamaualalo atu i le tatou mafutaga, e le uma le faiaso o le Alii, e le faapea ua vavae itumalo faapalota ona faapea lea o le a motusia lo tatou va nonofo ai i le usoga, leaga o oe o le uso. O le mea lea Lutatua ma Aiga e Tolu, faamalo le tapuai i le faiva foi o lo outou sui usufono. Sa tatou sisiva i le fua, sa tatou o i Tutuila, sa tatou o i Niu Sila tatou o i Amerika, ia ua uma la lalo nei, toe lava o le masina le mea lea e totoe. Aemaise foi si ou nuu i Fogaa aua le Toetaufanua ma Alo o le Malietoa

ma le nuu o Faleula, malo le fai tatalo, e malosi lava la outou auauna ona o la outou tapuaiga. Ia agalelei le Atua ma faapena ona foai le mau ia te outou. E le uma le faiaso, e i ai foi se taimi tatou te feiloai, ia o lea ou te faalogologo atu o lea ua amata ona tuu i lalo sa o isi toeaiina, se se i outou alolofa sole, o lea e ola le tou sui usufono. Onosai, aua le vave tuua i lalo lou sa i te i ua mama e le i taitai.

Ia, agalelei le Atua i lau Afioga i le Fofoga Fetalai ma le paia o le Maota i ona tulaga faalupe, lau Afioga i le Taitai o le Maota, agalelei le Atua, maua le tofa, faatumu le utu. Ia, liliu le vai o Sina aua Ofisa Sili o Pulega ma Ofisa Sili Lagologo, vae ma lima aua lo tatou Malo, ia agalelei le Atua foai lo outou malosi, ia maua sou ola. Soifua ma ia manuia.

FOFOGA FETALAI: Malo faafetai. O lele ua logo le nai atea ua logo foi le nai ama, ua logo faa-Tutuila le aso aua le saunoaga a lau Afioga i le Minisita mo Aoga, Taaloga ma Aganuu aua mea sa laga e sui usufono mamalu, faamalamalama ma faamanino. O le mea la lea, ia maua pea le tofa aua le agai i luma o le faatinoga o galuega a le Kapeneta.

Ae talu ai ona o lea ua tatou taunuu i le tatou malologa masani, o le a faataatiaese ese Galuega mo le malologa masani a le tatou Palemene.

Na faataatiaese Galuega a le Fono Aoa mo lana malologa masani i le itula e 10:45 i le taeao, ma toe faaauau i le itula e 11:45 i le taeao.

Na toe faaauau felafolafoaiga i luga o le faitauga faalua o le Tulafono Tau Faaofi o le Faatatauina o Tupe Faaopoopo (Nu.3) 2019/2020 ma le Tulafono Tau Faaofi o le Faatatauina o Tupe 2020/2021.

FOFOGA FETALAI: Ou te faasilasila atu ua toe amatalia Galuega ma Taulumaga a le Fono Aoa Faitulafono.

Malo le onosai i le tatou Palemene aemaise foi Ofisa Sili o Pulega o Matagaluega ma Faalapotopotoga a le Malo. E faia le tatou malologa ua maea ona saunoa le Afioga i le Minisita mo Aoga, Taaloga ma Aganuu.

Ma ou te tapa ma le faaloalo lau Afioga i le Minisita o Tupe e tulai maia e saunoa e tusa ai o mea sa laga e sui usufono mamalu o le Palemene.

Afioga Hon SILI EPA TUIOTI (Minisita o Tupe): Lau Afioga i le Fofoga Fetalai, faafetai mo le taulaga molia i lenei taeao tatou te sulaina ai le alofa ma le agalelei a lo tatou Matai Sili, ua tatou potopoto ai e faatino tiute ma faiva o lo tatou valaauina.

Ou te faatalofa atu ai i le paia maualuga i lenei taeao i le Fonousu a Samoa, - i lau Afioga i le Fofoga Fetalai, lau Afioga i le Palemia, le Aiga Kapeneta ma Minisita Lagolago, sui usufono mamalu o le Palemene o Samoa, aemaise Ofisa Sili o Pulega o Matagaluega ma Faalapotopotoga a le Malo. Ou te faatulou atu foi i le tapuaiga a Samoa i ona tulaga faalupe i Aiga ma a latou Tama, faapea le usoga a Tumua ma Pule Ono i Salafai.

Lau Afioga i le Fofoga Fetalai, ou te tulai atu ma le ava tele e faamalamalamaina mataupu sa laga e sui usufono mamalu o le Palemene e tusa o le Tala Faatatau o le Tupe 2020/2021, faatasi ai ma nisi o mataupu e tusa o matafai oi a le vaega maoti o tupe ma le Matagaluega o Tupe.

E tomua atu sau faamatalaga i le tulaga o i ai Samoa i upufai o Malo i le tulaga o le tamaoaiga. Lau Afioga i le Fofoga Fetalai, sa ou taua i lau lauga o le Tala Faatatau Autu o Tupe, o Samoa, o se atunuu ua maualuga lona faatulagaina i upufai aemaise lona tamaoaiga i le lio o atunuu laiti o le Pasefika. Ua 58 nei tausaga o lo tatou Malo Tutoatasi, ma o Samoa na mua i malae i atunuu uma o le Pasefika ua pulea lava e ona tagata lona Malo aemaise o le faatonufoiauina o lona sa mo se lumanai manuia o ona tagatanuu.

E tele ni vaega taua ua mafai ona ausia e Samoa i nei tausaga e tele ua ia faafoeina ai lona Malo ma ou te toe tolaulauina atu nisi o vaega tetele e faapenei.

1. Avea o Samoa ma sui auai i le tele o faalapotopotoga faava o Malo e aofia ai le Malo Afaatasi (United Nations); sui faavae o le Faletupe o le Atinae o Asia (Asian Development Bank Founding Member I le 1966); Sui auai i le Faletupe o le Lalolagi (World Bank), Faalapotopotoga o Faaputugatupe o le Lalolagi (IMF), Faletupe mo Atinae tetele o Asia (AIIB); Faalapotopotoga ua i ai lo tatou sao, o latou tonu fai aua se manuia o Samoa mo le lumanai.

2. Siitia le tulaga o Samoa o se atunuu ua faatupulaia lona tamaoaiga faatusa i le tulaga mativa sa i ai muamua - Siitia mai le tulaga o le Least Developing Country i le Developing Country.

3. Siitia le malosia tau tupe faatulaga mo tagata taitoatasi e fua i le tamaoaiga (Cross Domestic Product/GDP per capita) mai le \$2,150 tala Samoa i le 1980 i le \$11,950 ua i ai i le taimi nei.

4. Usuia mai i laufanua o Samoa o fonotaga tetele faava o Malo, faatasi ai ma taaloga faava o Malo. E le gata i le manuia ai o le atunuu e ala i le atinae o tagata tafafao maimoa mai fafo, ma maua ai galuega a fanau a Samoa, ae o se avanoa foi e tu matila ai Samoa i upufai o Malo laiti o le Pasefika, o se atunuu e faimea mafai ma ua mafai foi ona faatino mea uma ona o le maualuga o le silafia ma le agavaa e faatino ai galuega faapenei, faapea le tulaga lelei o aoaoga a ana tamafanau.

5. Ua i ai le Iunivesite a Samoa lava ia e faafaileleina ai le tulaga o aoaoga a le fanau, ma ua faatuina foi i totonu o le atunuu lala o isi iunivesite maualuluga ma isi matata e aofia ai ma le aoaoina o mataupu tau faa-fomai.

6. Ua faaleleia ma siitia le tulaga o le tatou malae vaalele ma uafu i tulaga faava o Malo, ina ia faafaigofieina ai femalagaaiga faava o Malo faapea fefaatauaiga faava o Malo ma a tatou paaga. Ua i ai foi le kamupani vaalele ma le kamupani vaa ua pulea i lo tatou atunuu e lagolagosua i a tatou atinae, aemaise le atunuu femalagaaia ma oloa e auina atu i fafo.

7. Ua faatuina i Samoa nei e le gata i Ofisa Amepasa o atunuu o lo o tatou faipaaga, ae ua faatuina foi Ofisa Tutotonu o tatou Faletupe o Atinae o Asia ma o lo o faafoeina lava e o tatou tamafanau, nei faletupe faava o Malo. O nei gaioioiga ua saga faafaigofieina ai a tatou faigapaaga aemaise o le tatalaina mai pea lea o fesoasoani a nei faletupe mo a tatou atinae tetele o lo o lagolagosua i le atinae o le tamaoiga o Samoa.

8. Fausiaina o malae taalo faava o Malo e le gata ina siitia ai le tulaga o malae taalo e faatino ai taaloga i Samoa nei, ae o se avanoa foi e tapena ai tama fanau a Samoa mo taaloga faava o Malo e maua ai galuega ma faapaleina ai Samoa i tulaga maualuluga i faagatama faava o Malo. E le galo taaloga tetele sa usua mai i Samoa nei, e pei o taaloga a le Manu Samoa ma le All Blacks i le 2015, o le Commonwealth Youth Games i le 2015, faapea taaloga o le Pasefika i le 2019.

Lau Afioga i le Fofoga Fetalai o le mea e mautinoa, ua mafua ona aumai nei taaloga i Samoa ona o le maualuga o le talitonuga o atunuu tetele, ua lava tapena Samoa e talimalo i so o se taaloga faava o Malo, ona o fale taalo ua lava saunia e le Malo, ma ua lava foi le tomai o tama fanau a Samoa e faafoeina ai nei taaloga.

9. Faaleleia o maota o le Malo e galulue ai tagata Samoa o lo o faafoeina galuega tau le Malo. Ua avea foi nei maota o le Malo ma avanoa e faatuina ai pisinisi a le toatele o le aufaipisinisi i le taulaga i Apia ae faapea foi Salelologa i Savaii.

10. Le faaleleia o auala sima, aualatetele, talivai sima i Vaisigano, o le taligalu ma galuega e puipui ai le gataifale, ma le tele o atinae tetele a le Malo ina ia mafai ona tali atu i le suiga o le tau (disaster resilient infrastructure). O le mea moni lau Afioga i le Fofoga Fetalai, ua ese lenei vaitau, ma e tataua ona tatou tapena lelei i a tatou atinae tetele aua le saogalemu o le atunuu femalagaaia aemaise o le saunia lelei lea o a tatou atinae ina ia mafai ona tali atu i suiga ogaoga o le tau. E le tau faailoa le taua o galuega tele o le auala sima i Maliolio, e le i mamao tele atu ona tatala aloaia e le Malo. O se galuega tele ua faatino e le Malo e ala i fesoasoani mai a tatou paaga ina ia malupuipuia le atunuu i so o se taimi e faaaogaina ai, e aofia ai ma aso louloua o le tau lea o le a le toe afaina ai se tasi i lea vaega o le atunuu.

Lau Afioga i le Fofoga Fetalai, o le auga ma le autu o le faamatalaga ua ou taumafai atu i ai, ua tele suiga ua tatou vaaia i lenei vaitau, ona o galuega ma atinae lelei ua tapena e le faigamalo a le HRPP e pei ona to mai i ai le faatuatuaga o le atunuu ona o se Vaega Faaupufai e le gata ina faalauiloa ana

fuafuaga ma atinae, ae o se Vaega foi e savali i ana upu ma tala i le faatinoina o atinae e manuia ai lo tatou atunuu. O Samoa o se atunuu laitiiti, ma e tele luitau e feagai pea ma i tatou i aso uma ona e le gata ina laitiiti le tamaoaiga ma faigata ona faatosina mai pisinisi ma atinae tetele i totonu o le atunuu, e mamao foi Samoa mai maketi o lo o tatou faipaaga aemaise le taugata ai o fesootaiga faapisinisi. Ou te fia faamamafa foi lo tatou aafia tele i suiga o le tau lea ua taua e nisi e ono lamatia ai le lumanai o atunuu laiti po o le Ex-essential threats for small island states. O lona uiga, e tataua ona lava tapena fuafuaga mamao a Samoa aua le tali atu i nei luitau tetele. E tataua foi ona malosi ma faatuatuaina a tatou taiala aua le tau faasoasoina o lo tatou tamaoaiga, aemaise o nai tupe o lo o maua lava i totonu o Samoa nei ma nai fesoasoani o lo o agalelei mai ai nai a tatou paaga.

Lau Afioga i le Fofoga Fetalai, o lea ua tapena nei e Samoa e tauala atu i le Matagaluega o Tupe le vaaiga taulai mamao ua taua o le Samoa 2040. O lea vaaiga taulai ua agai ai le Malo e ave le faataua i vaega taua e 7 e aofia ai: 1. Lalaga ma siitia atinae o faatoaga. 2. Faaleleia ma siitia atinae o turisi. 3. Siitia le tulaga o fesootaiga faatekonolosi po o le ICT development. 4. Saili avanoa faigaluega mo fanau a Samoa, labour mobility. 5. Faaleleia ma faamalosia atinae tetele, resilient development. 6. Faataua aoga ma le soifua maloloina, human capital development, ia ma le saogalemu o si o tatou atunuu. Ua ou faatauaina le tapena ma le faataoto lelei o fuafuaga mamao a lo tatou Malo, ona e faamoemoe i ai ana atinae uma o lo o faatinoina nei. O lo o faaauau foi ona fesoasoani mai paaga e pei ona faailoa atu i le Tala o le Tupe le siitia maua o fesoasoani tuusao po o increase budget support ona o le latou faatuatuaina o a tatou faiga faavae ma ua silafia lelei foi e paaga le manino ma le maoti o vaega o lo o ave i ai le faamuamua a Samoa, e aofia ai le tapenaga mo le Samoa 2040. O nei fuafuaga mamao o lo o lagolagosua i ai le taiala mo le atinae o Samoa, Strategy for the Development of Samoa lea o lo o faamoemoe i ai galuega ma atinae o Samoa e pei ona faatulagaina mo vaega maoti e 14 mo le 5 tausaga e faatino ai ana galuega. O lona uiga, o se atunuu e lelei tapena ana fuafuaga mamao, e le taumate foi le tulaga lelei e taunuu i ai ana atinae mo le uunaia o le tamaoaiga. Mo Samoa, o lo o malosi le tulaga o ana faigapaaga ma atunuu faapea faalapotopotoga o lo o tatou galulue faatasi ona o le faatuatuaina o taiala, faiga faavae, aemaise o fuafuaga mamao ma vaaiga taulai ua tapena ma ave i ai le faamuamua a lo tatou Malo.

Lau Afioga i le Fofoga Fetalai, e leai lava ma se tulaga e faapopoleina ai le atunuu i le tulaga o lo o i ai lo tatou tamaoaiga. Sa fesiligia e nisi le moni ma le malosi o le mau e faavae ai le ausia o tupe maua a le atunuu e \$588 miliona e ese mai tupe faameaalofa mai paaga e \$249 miliona. Mo le silafia e 10% ua faaitiitia ai tupe e maua lava i totonu o Samoa ona o aafiaga o le faamai o le Covid-19 i le tamaoaiga o lo tatou atunuu. E talitonu le Matagaluega o Tupe, e mafai ona tatou ausia le tupe ua fuafuaina e aoina mai le \$588

miliona pe sili atu foi lenei tupe maua ona o mafuaaga nei: 1. Amatalia i totonu o le tausaga faaletupe fou le aoina mai o lafoga VAGST a pisinisi e faaogaina ai le Tax Information Management System (TIMS). 2. Faatuina o le masini e suesueina ai oloa e ulufale mai le uafu i Matautu i se taimi e le o toe mamao. 3. Faaauauina o polokalame ma poloketi i atinae tetele ua maea faatulagaina mo tausaga faaletupe o loma nei. O nei atinae e le gata ina maua ai galuega ma siitia ai le tulaga tau pisinisi ma maua ai lafoga a le Malo, ae tele lona fesoasoani ina ia maua ai pea tupe mai fafo e faaoga mo fefaatauaiga faava o Malo po o a tatou foreign reserves. 4. E le o aafia Samoa i le Koviti-19. O lona uiga, e tatau ona mafai ona faafoisia lo tatou tamaoaiga i se tulaga vave pe afai e vave maua se fofo po o vaccines o le faamai ua aafia ai le lalolagi.

Lau Afioga i le Fofoga Fetalai, ona ou oo mai lea i se tasi o mataupu sa lagaina mai ma lagalaga ai finagalo o nisi o sui usufono mamalu, o le faasiliga lea o tupe faaalu i tupe maua a le Malo po o le deficit lea ua fuafuaina ai le 2.3% mo le tausaga faaletupe o loma nei, tausaga 2020/2021. E ao pea ona faamanino, o lenei faasiliga ua na o se fuafuaga po o le budget ae tatou te le mautinoa mea o le a tutupu i tausaga taitasi. O lea ua tatou feagai nei ma le aafiaga o le Koviti-19 ma e sosoo lava ma le faamai o le misela sa aafia ai lo tatou atunuu i le faaiuga o le tausaga na tea nei. O nei luitau, e leai se isi na te iloa pe silafia foi o le a mafatia ai Samoa i le amataga o lenei tausaga faaletupe.

Lau Afioga i le Fofoga Fetalai, mo le 4 tausaga faaletupe sosoo e amata mai le 2015/2016, e oo mai le 2018/2019, sa matauina pea se tulaga lelei o le faasoasoina o le tatou tamaoaiga, e ui ina fuafuaina ai budget deficits i nei tausaga sosoo e 4.

E agai se faamatalaga i le taunuuga o galuega faatino faatusa i fuafuaga i le amataga o le tausaga, actuals vs budget deficit e faapea: Mo le tausaga faaletupe 2015/2016, sa fuafuaina e 4.7% o le a sili ai tupe faaalu i tupe aoina. Ina ua maea le tausaga lena, e na o le 4% le faasiliga o tupe alu i lo tupe maua, po o le actual deficit. I le tausaga e sosoo ai 2016/2017, sa fuafuaina e 3.5% o le a sili ai tupe faaalu i lo tupe aoina. Ina ua maea le tausaga lena, e na o le 1.1% le faasiliga o tupe alu, po o le actual deficit sa faamauina. Mo le tausaga 2017/2018, sa fuafuaina le budget deficit e 3.5% ae faaiuina le tausaga ua faamauina ai le deficit e 2.0%. I le tausaga na sosoo ai 2018/2019 mai le 3.5% o tupe faaalu faasili i tupe maua sa fuafuaina, sa faamauina ai mo le taimi muamua i le 5 tausaga ua tuanai atu se faasiliga po o le surplus e e 2.7%. O lona uiga, ua sili atu tatou tupe maua i lo tupe na faaluina. O lona uiga lau Afioga i le Fofoga Fetalai, o nei tapenaga uma ua na o ni fuafuaga e mafai ona tapena e le tagata, a ua na o le Atua na te silafia le taunuuga. Lau Afioga i le Fofoga Fetalai, o tausaga uma lava taitasi, e sili atu lava tupe faaalu nai lo tupe maua i tala faatatau o tupe a le Malo. O le mafuaaga ona o a tatou galuega ma atinae faatino tetele lea e faatino i

fesoasoani mai fafo po o tatou grants faatasi ai ma nai nonogatupe tului maualele o lo o fesoasoani i ai i a tatou tupe e aoina i totonu o le atunuu. E le o se mea leaga la le faatupulaia o a tatou atinae, aemaise o nei galuega e tele le sao o lo o fesoasoani mai ai a tatou paaga. Mo le silafia foi, o galuega faatino a le Malo ma ana atinae e le muta i se tausaga e tasi, e i ai atinae o lo o faatupe mai a tatou paaga e 2 i le 4 tausaga e faatino ai, e pei o le malae vaalele i Faleolo, ma le auala ua toe faaleleia mo le agai atu i le malae vaalele i le itu i sisifo o Upolu lea e umi se taimi e faatino ai, ma e tauave le paleni totoe mai le isi tausaga i le isi tausaga faaletupe. O lona uiga, e sese le faamatalaga ua gau le Malo. O le tele o atinae tetele ua faatino, e tele tausaga e faatino ai, ma e tele atu lona sao i le atinae o Samoa e ala i galuega o lo o maua ai, fesoasoani ma lagolagosua i isi atinae o le atunuu e pei o le atinae o turisi, aemaise o lafoga i oloa ma totogi o tagata faigaluega o lo o maua mai ai e faatino ai atinae ma galuega faaauau a le Malo.

Lau Afioga i le Fofoga Fetalai, e ao foi ona silafia e le Palemene ma sui usufono mamalu le malosi tau tupe e fua i aseta umia a le Malo e pei ona auiliiliina mai tausaga taitasi e ala i le faamatalaga tau tupe a le Malo po o public accounts. Mo le tausaga faaletupe 2018/2019, o lo o auiliilina ai le tuuaotelega o aseta po o le net worth a lo tatou Malo, e \$987 miliona e fua i ana aseta po o total assets tuufaatasi e \$2.1 piliona e faatusa i noataga po o liabilities e \$1.15 piliona. O lona uiga o lo o gafatia lava e le malosi tau aseta a le Malo faatasi ai ma ana teugatupe faavaitaimi i Matagaluega a le Malo ona totogiina ana aitalafu i so o se taimi.

Lau Afioga i le Fofoga Fetalai, ua saunoa nisi sui usufono ua faapea mai ua gau le tatou Malo. Ma le faaaloalo lava, e le faavaea leni saunoaga. E leai se Malo mai fafo po o se paaga e fia fesoasoani mai ia i tatou pe a vaai mai ua gau lo tatou Malo, pe faapaole ona tatou faataoto ma faatino ana galuega ma atinae. O le mea moni, e le o faatamala le Malo i le faatinoga o ana atinae, ma o lo o tausisia foi taiala ma faavae o nei fesoasoani ma tupe mai fafo e pei ona faatino ai le tele o atinae tetele e aofia ai auala, alasima, malae vaalele ma uafu, faleaoga, maota gasegase ma le tele o nisi atinae lea o lo o faatino e lo tatou Malo e ala i le maau o paaga ma Malo agalelei mai i si o tatou atunuu.

Ona ou oo mai lea i a tatou aitalafu. O le tausaga faaletupe 2020/2021, e leai ni aitalafu fou o le a faatino ai se i vagana le \$11.4 miliona o aitalafu faaauau sa sainia mo poloketi e 2 mo tausaga ua tuanai atu, o lea ua faamaea ona tuuina mai. Ou te le taliaina saunoaga a nisi o sui usufono faapea ua le toe taliaina nisi o aitalafu fou mo Samoa. O le mea moni, ua uma ona faailoa e le Malo lona agaga e mataitu lelei aga o le faamai pipisi po o le a le umi e faaauau ai ana faiga le alofa i le lalolagi. Afai e umi ona afaina le lalolagi ma lona tamaoaga, o le a toe fetuunai foi tulaga tau tupe a lo tatou Malo, ma o le a oo lava ina avanoa, fiscal space e mafai ai ona toe silasila le Malo i ni aitalafu pe a moomia lea as a last resort. Ae mo le taimi nei e le o

manaomia ni aitalafu, ma o lo o taumafai le Malo ina ia aoaoina mai lafoga mai tagata uma, faatasi ai ma taumafaiga e mataitu lelei le faaaogaina lelei o ana tupe maua, aua le lagolagosua ai i le atunuu i le taimi nei. A fua foi i le malosi e totogi ai aitalafu, e na o le 10% po o le 11sene o le tuuaotelega o tupe maua a le Malo o lo o totogi ai aitalafu. O le isi 89 % po o le 89sene mai le tala e tasi, o tatou tupe maua lea o lo o mafai ona faasafua atu, e faatino ai isi galuega a le Malo e aofia ai totogi o ana tagata faigaluega, totonu o galuega faatino a Matagaluega ma Faalapotopotoga a le Malo, ma le tele o atinae o lo o faatupe e le Malo, ma o lo o fesoasoani mai ai a tatou paaga e faatupe le tele o manaomia, faatasi ai ma nai aitalafu o lo o fesoasoani i ai i vaega o lo o manaomia.

Ona oo mai lea o se faamatalaga i sini autu sa faavae ai le tapenaga o le Tala Faatatau Autu mo le tupe o le 6 tausaga, e oo mai i le taimi nei. 1. O le Tala Faatatau Autu o le tupe o le tausaga 2015/2016, sa avea ma taiala le sini autu, e fua le manao i le seleni lo ua maua. O se taiala sa mulimulitai i ai lo tatou Malo, e pei ona manino i le faasoa i lena vaitau, ma e ui i le tele o tapenaga sa fuafuaina e le Malo. Sa amata faataoto le taiala ina ia faaitiitia i tausaga taitasi, le faasiliga o tupe alu i lo tupe maua, gradual decrease in budget deficit. Lea na oo le maualuga i le 55% i lena vaitau ona o taumafaiga ina ia faafoi le malosi o le tamaoaiga i le tulaga sa i ai, ae le i aafia Samoa i mala faale-natura sosoo. Na amata mai i le tsunami o le 2009 ma le afa o Evani i le 2012. O le 2016/2017, o le uluai Tala o le tupe o lenei Paeaiga, sa faaautu i le “Faamalosi le Faavae ma tapena mo a taeao”. O se taiala sa faaali manino ai le finagalo o le Malo, e tapenapena Samoa mo le lumanai, e ala i taiala, vaaiga taulai mamao, ma fuafuaga e lagolagosua i ana atinae aemaise, o vaega taua o lo o ave i ai lana faamuamua, o priorities of government. O le 2017/2018, o le tausaga sa faaautu i le sini “Agavaa tutusa ma le talafeagai”. O lea sini autu ua taoto ai le finagalo o le Malo, e taua atinae mo tagata uma, ma e tataua ona fai sao Samoa uma i le atinae o le atunuu. O le agaga o le Malo i lea tausaga, o atinae e mo le manuia o tagata uma. Ma e tataua ona tatou galulue faatasi, e aofia ai le totogi uma o a tatou lafoga aua atinae mo le manuia o Samoa atoa. O le tausaga 2018/2019 sa faaautu i le “Filifiliga sao” ma e agai le finagalo o le Malo e faamautu ma faamalosi taiala ua maea tapena e saga faamausali ai le atinae o Samoa mo le lumanai. O le tausaga lea sa ausia ai e le Malo se faasiliga o tupe maua i lo tupe alu i le 2.7% o le surplus, e pei ona taua muamua, ma atagia ai le faamaoni o le Malo, e le gata ina folafola ma fuafua, ia ae savali ma faatino nei galuega mo le tatou atunuu. O le tausaga o lo o faagasolo nei 2019/2020, ua faaautu i le “Ia autasi le vaai le vaai, mo se manuia o Samoa”. O lo o faatumauina ma faataua e le Malo le galulue faatasi mo se manuia lautele o nai o tatou tagata o le tatou atunuu. O le feau foi lea mo le tausaga faale-tupe fou 2020/2021, ina ia tatou lalagaina faatasi se lumanai manuia ma mausali mo Samoa. Lau Afioga i le Fofoga Fetalai, o atinae ma galuega uma a lo tatou

Malo, o lo o ave lava le faamuamua i tagata uma o le atunuu, ina ia maua se lumanai manuia. O le sini autu o le Samoa 2040 faapea taiala mo le atinae o Samoa o lo o faavaeina, i le agaga ina ia siitia le soifua manuia mo tagata Samoa. Lau Afioga i le Fofoga Fetalai, e le tuulafoaiina e le Atua lona nuu. O tatou lava e fuafua ma tapena, a o le Atua na te faatino, faataunuu ma foai mai le malosi ia i tatou i so uma e ala i ana faamanuiaga mo Samoa. O le alofa o le Atua ia Samoa o lo o faaali manino i le tatala mai pea o fesoasoani o lo o agalelei mai ai a tatou paaga. E le o aafia Samoa i le faamai e pei ona vevesi ai le lalolagi ona o Lona alofa mutimutivale ia i tatou. O le faafetai lena i lo tatou Tapaau Sili i le lagi, i lona faatasi mai ia i tatou i taimi uma.

Lau Afioga i le Fofoga Fetalai, o le a ou agai loa i nisi o mataupu sa fesiligia e sui mamalu o le Kapeneta. 1. Mo le NPF ma lana faamama avega, ou te faailoa atu e faapea. (1). O le faamama avega e \$35 miliona sa faasalalauina i le tatou faamama avega po o le stimulus package phase 2, ua i ai nei le faamoemoe o le a faalauiloa aloaia i le faaiuga o le vaiaso nei, lena faamama avega ma faamautuina ai nisi o vaega sa fesiligia, e aofia ai le pasene e tuuina atu i le atunuu. O le aso e faatino ai, ma isi vaega taua ua tapena i ai le pulega ma le komiti faatonu. (2). Totogiina o pasese mo penisione o e femalagaai i Manono ma Apolima. O le a faatino se suesuega a le Matagaluega o Tupe ma le NPF e tusa o lea talosaga, e fua i le tau e faatino ai, faapea gaioiga manaomia, process e faatino ai se fesoasoani faapenei. (3). E le faavaea le saunoaga a se tasi sui usufono e faapea, e na o tagata pisinisi mai fafo, o lo o agavaa i nonogatupe mai le NPF i le taimi nei. E sese lea faamatalaga. O tulaga masani lava, e tauaaoina loa so o se talosaga mai le atunuu, faatino loa suesuega a le Faalapotopotoga i luga o talosaga e fua i le mafai ona totogi....

FOFOGA FETALAI: Malie lau Afioga i le Minisita o Tupe, se i tulai mai le faauilavea, o Palauli i sisifo.

Afioga Afoa Amituanai Faleulu Mauli (Palauli Sisifo): Leaga sa lavea i lau lauga i le aso ua tuanai. E faamaoni lau lauga e uiga i tupe ia e ave i tagata i fafo, ae le faamanuiaina o tatou tagata. E i ai le \$5.7 miliona lea sa ave e le NPF i tagata mai fafo mai Asia, lea ua fai ai nei ana pisinisi. Faatau mai i, ma faatau atu o mea faapena. A o tatou tagata Samoa lava latou ia, e leai se avanoa e maua ai ituaiga faamanuiaga nei. Ou te le iloa la pe faapefea ona faamatuu atu nei nonogatupe e tele i tagata nei, ae o tagata mai fafo, sa tatau ona matua aumai ni a latou tupe iinei i Samoa, e faatino ai a latou atinae. A faapea e faaalu ai pea le ituaiga mea lea, o lona uiga e uma atu le isi 10 tausaga, ua na o tagata mai fafo ia ua fai a latou pisinisi. Aua o lea e i ai le tupe lea, ae ua leai ni tagata Samoa. O tagata o le tatou atunuu lea e tatau ona ave i ai le faamuamua, e ave i ai tupe nei. A o lea ua \$5.7 miliona, o lona uiga lau Afioga i le Fofoga Fetalai, a fua i le vaai.

FOFOGA FETALAI: Ua maua atu le faamalamalama, faapuupu mai o lea ua maua atu. O lou finagalo o le eseese o le treat ina o tagata Asia... se i saunoa mai le Minisita e faamalamalama.

Afioga Hon SILI EPA TUIOTI: Lau Afioga i le Fofoga Fetalai, o lea la o le a toe faitau atu ia manino. E sese ma le faavaea saunoaga a le sui usufono, lea na faapea na o tagata ma pisinisi mai fafo o lo o agavaa i nonogatupe mai le NPF i le taimi nei. O le tulaga e masani ai, po o le NPF po o le ANZ po o le BSP po o ai lava e i ai le process e faia. O le tulaga masani lava, e tauaaoina loa so o se talosaga mai le atunuu, faatino loa suesuega a le Faalapotopotoga po o le faletupe i luga o le talosaga e fua i le mafai ona totogi. O tupe maua a le pisinisi e totogi ai le aitalafu, faapea le credit history po o le tulaga i le talosaga pe o se tagata totogi aitalafu lelei pe leai. Ua silafia foi e le Afioga i le sui usufono, ua taua foi latou ia faapea o tagata Asia ma Saina, o le toatele o i latou o lea ua sitiseni. Ua mafai ona nono mai tupe ia.

FOFOGA FETALAI: Malie se i tulai mai le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaioi: Lau Afioga i le Fofoga Fetalai, o le sui usufono lea e tutulai mai nei, e i totonu o le Komiti o le Palemene lea e vaavaai i lipoti, lipoti a le NPF. Ua faafia ea ona aumai lipoti a le NPF i totonu, ma aumai ai le faatulagaga o le vaega, ia tupe o lo o nono atu i le aufaipisinisi, nono atu i le aufaifaatoaga. Ua faafia ona aumai lipoti ia, ae sau lea, o se sui usufono sa i totonu o le Komiti soona saunoa i totonu i i, e le o avea i se Samoa. Lau Afioga i le Fofoga Fetalai, o lena ua uma ona e silafia, le finauvale o le sui usufono lea e tulai mai nei. Sa ou manatu o ia o le isi suetusi e tilotilo i i, i mea ia, saofai i totonu o le Komiti o le Palemene e avatu i ai lipoti uma nei ma vaavaai i ai. Ae o le tu tu ae i luga ma saunoa mai ma aumai ni manatu le faavaea faapea. E lelei ona e toe nofo ma faitau lelei au lipoti, ma saunoa i mea moni. Ae le o le tu ae lava fai ni lafoga le faavaea faapea, a o la e saofai i totonu. Ua faafia ona aumai lipoti a le NPF i totonu i i, aumai manino ai, ia a latou tala o latou tupe maua, ma faatulagaga o nonogatupe e fai i tagata faipisinisi.

Lau Afioga i le Fofoga Fetalai, o le mea lena ua ou tulai atu ai. Sa ou manatu e malamalama le sui usufono. Ae le faapea afai na e talosaga foi oe i le NPF, ae le talia sau talosaga ona e silasila lea i mafuaaga. O mafuaaga la ia e pei ona tolaulau atu. E leai se faletupe, leai se faalapotopotoga e mafai ona soona avatu ni tupe, ae le tilotilo, pe a mai le tagata o lea e talosaga, faapea lona talaaga, faapefea. Ae ia manatua lelei, o tupe nei a le NPF o tupe a le au faisaoaga. O lo o i ai le tiute i le komiti ina ia matua talitonuina. Afai

loa e ave a latou tupe e teu faafaigaluega, ia toe foi mai le seleni, foi mai ma le faasiliga ina ia faaauau pea le aveina atu o tupe faasili mo le au fai-sao, o latou seleni ia e teu faafaigaluega i i. Lau Afioga i le Fofoga Fetalai, o lou tulai atu lena. O le sui usufono sa ou manatu e tele le oa o mafaufauga la e i ai, e faitau manino ai ma malamalama. Afai o oe o se suetusi, faitau ma le malamalama.

FOFOGA FETALAI: Malo. Tulai mai le... malie le sui usufono mo Palauli i Sisifo, malie le sui usufono leaga o lea ua e finauina. O le tatou Tulafono Tumau, e le mafai ona fai se faafinauga i se tulaga o se mea ua maea ona faamanino ma faamalamalama muamua. Ma o se finauga foi lea sa faapena ona faamalamalama muamua atu e le Malo, aemaise o le Taitai o le Malo. E leai la se faafinauga, o le faamalamalamaga a le Malo, o le faamalamalamaga lena. E tatau ona malamalama i ai le sui usufono. Aua o le sui usufono foi ia o le suetusi, ia e faigofie lava. O ita e le o se suetusi ae o le faigofie ia ona ta malamalama i le mataupu. Ae malie le sui usufono, o le a leai se faafinauga, ae a pe a taoto ia lou finagalo, ae se i faaauau le saunoaga a le Minisita o Tupe.

Afioga Afoa Amituanai Faleulu Maui: Ou te le o fia tali atu i le Afioga i le Palemia.

FOFOGA FETALAI: Malie lou finagalo... e leai la...

Afioga Afoa Amituanai Faleulu Maui: Ou te le o fia tali atu i le Afioga i le Palemia ona o lea sa tuuaia au e le Minisita fai mai e le sao ia faamatalaga na ou avatua, ae o faamatalaga ia e avatu o facts. O la e i totonu o tusi, o la foi e faasalalau i nusipepa ma mea uma faamolemole

FOFOGA FETALAI: O lea o le a ou faamalamalama atua.

Afioga Afoa Amituanai Faleulu Maui: O le mea lea o lea ou te tulai atu ai e faasao...

FOFOGA FETALAI: Ou te le faataumatatao, a ou fai atu loa ona e alaala lea i lalo, o le Tulafono lena. Ioe, e faapena, se tatou galulue i le avafatafata. Toeitititi ona faaaoga lea o aulape o le tatou Tulafono. Ou te le manao e uma lenei Nofoaiga ua tuli se isi i fafo faamolemole. Ua faamolemole atu i sui mamalu. Tulai mai le Minisita e faaauau le saunoaga.

Afioga Hon SILI EPA TUIOTI: Faafetai i lau Afioga i le Fofoga Fetalai. O lau fautuaga i le sui usufono mamalu, e sili pe a alu e vaai faalelei po o e totoi aitalafu po o fai tulaga faapena. O le portfolio atoa lava a le NPF,

toeitiiti lava atoa le piliona o tupe e mafai ona nono atu mo tagata uma. O tagata taitoatasi, o pisinisi o i latou uma faapena. E ala ona le pasia, ona o le tulaga o la e fai le credit cheque, e le fetau.

Lau Afioga o le a ou faagasolo pea, i le vaega lona (4) i lalo o le vaega lenei a le NPF, e toe faamanatu atu i nai tama ma tina matutua. O le masina fou, o le a siitia ai le penisione, mai le \$145 i le \$160 i le masina. O lona uiga ua \$15 ua faaopoopo o le masina. Ma ua i ai foi ma le ponesi faaopoopo mo le masina o Iulai, e \$100. O lona uiga o tama ma tina matutua, o le latou penisione o le a maua i le masina o Iulai ua \$260, o lona uiga a faasolo atu loa i isi masina ua \$160, o se siitaga e \$15. O le isi vaega sa laga, o le vaega lea o le \$50 mo le lesitalaina o le atunuu. O lo o galulue pea faatasi se komiti tofia po o le task force e aofia ai le Matagaluega o Fuainumera faamauiina, Matagaluega o Fesootaiga ma Tekonolosi ma le Ofisa o Faigapalota, Matagaluega o Fesootaiga, Matagaluega o Tina ma Tamaitai, Atinae o Nuu ma Agafesootai, Matagaluega o le Soifua Maloloina ma le Ofisa o Tupe, e faamautu tulaga manaomia uma o lenei galuega. ae le i faatinoina ia Iulai ma Aokuso o lenei tausaga. O lenei foi galuega, e le i faatinoina e taua ona e faamautinoana, e le gata i le faitauaofai o tagata i totonu o aiga, e faapena ona i ai uma latou o le aiga, ina ia maua ia faamatalaga lea e faaoga i le fausiaina o le tatou ID. O le tele foi lava o faamatalaga mai a tatou surveys ia e masani ona fai, e pei o le faigata ona o mai uma ia aiga, matua ma fanau i se mea e tasi, ona le atoatoa ai lea o faamatalaga. O le fuafuaga lenei mo lenei... o le tuu atu o le \$50 i so o se isi lava ua uma ona laisene i totonu o aiga, ma uma ona lesitala. O se fesoasoani foi lea ina ia mautinoana e i ai uma i latou i le taimi e oo atu ai le au faitau i o tatou nuu ma o tatou aiga, ma fesoasoani ai foi i femalagaaiga ma tulaga faapena.

FOFOGA FETALAI: Malie le Minisita se i tulai mai le sui usufono mo Faleata.

Tofa Lealailepule Rimoni Aiafi: Lau Afioga i le Fofoga Fetalai...le Minisita se i fai foi ma tau malolo i le manaia o nei mea e aumai. Sa faataua lava i lau lauga le tupe lea e tuu mai i le NPF le \$35 miliona lea e aumai i le Tulafono, i le latou kivi masani foi lea o faamanuiaga masani lea e aumai ia i tatou. O le mea e faafetai ai, o le NPF na o le 4% lava le latou obligation, e na o le 4% lava le mea e tataua ona fai e latou. Ae o lea e matauina e oo lava i le tai 10% i isi tausaga. A o le agaga lea na avatu ai lau talosaga lau Afioga i le Minisita ma le Matagaluega, i le fuafuaga lea o le a tufa ai nei le dividend lea i le tausaga lenei, le faamanuiaga lea. E tataua ona tagai i ai, ia aua ne i faia i le faiga masani foi lea, ae mafai ona aumai loa e faataunuu le upu lea o le stimulus, o le mea e faaola ai le tamaoaga ma fesoasoani i lenei taimi vaivai o le aufaigaluega ma le au faisaoaga. Tufa sao, ave le avanoa i

le tagata, a ua manao uma i lana kivi, manaia foi lena vaega e toe faataamilo ai le mea i lenei vaitau. O le talosaga lea.

FOFOGA FETALAI: Malie le Minisita se i tulai mai le sui usufono mo Anoamaa i Sasae.

Afioga Alaiasa Muagututia Moefaauouo Malagaitutogiai Sepulona Moananu (Anoamaa Sasae): Faafetai mo le saunoaga matagofie a le Afioga a le Minisita, lea sa faalogologo foi lava i tualumaga o le saunoaga a le Minisita. Ua fiafia foi le mafaufau, aua e pei o lea sa taufesiligia mea ia, o le aoina o tatou tupe maua lea e taua e \$588 miliona. Ae o lea lava e maualuga le faamoemoe o le Minisita e mafai ona aoina. Ua kilia ai foi si mea sa polepole ai ona o faaletonu o lo o i ai nei tamaoaiga o le tatou lalolagi. Ae o lea ua oo i tatou tupe ia, o lea foi ua malamalama i le tofa na ae e fai ai le... ina ia ua matua sao ma atoatoa a tatou faamaumauga, e pei ona i ai le galuega fita a vaega lea o faamaumauga. E tasi lava le fuainumera lea ou te faalogo pea i ai i le mea lea o le GDP per capita, lea ua faapea mai e \$11,000 lea ua i ai. O le fuainumera lava lea, o le fua lea o le tamaoaiga, i latou o lo o fuaina le tamaoaiga i so o se atunuu. Ae i ai lava taimi foi ia, mo le faafofoga mai a o tatou tagata i nuu i tua, ia e le tutusa uma tagata. Aua a tatou o lava la i le per capita faataitaiga, e toa 6 le aiga la i tua, o le tama o le tina ma lana fanau e toa 6 o lona uiga e \$66,000 le tupe e tataua ona ola ai i le tausaga. Ae le o le mea lena o la e tupu, pe a tatou fuafua, leaga o fua ia faale-tamaoaiga, e i ai foi isi tagata i totonu o le taulaga, e fai lava si maualuga o le mea la e i ai. O le reality la o le mea, te i ua taitainasese ai tagata, e le tutusa uma. Leaga e i ai le isi taimi ua le fair le distribution o le wealth ua tele e e tetele, ae le tutusa ma e, ae o le fua lea o lea e fua ai, ae faafetai mo le avanoa. O lea ua malamalama i mea uma ia sa taua e matou foi faamatalaga, e tusa ai ma le penisiona ia ma le tatou \$50. Faafetai mo le avanoa.

FOFOGA FETALAI: Tulai mai le Minisita.

Afioga Hon SILI EPA TUIOTI: Lau Afioga e pei ona taua le \$50 lea mo le lesitalaina o le atunuu, o lenei faamama avega e le gata ina fesoasoani ai i le atunuu lautele o lo o mafatia o latou tamaoaiga, ma tupe maua i le faamai o le Koviti-19, ae o se taumafaiga foi ina ia mautinoa le faamaumauina o tatou fuainumera lenei. Ma o le tausaga e tapena i ai le Malo e ala i le National ID ma le faitau aofai o le tatou atunuu. O le taimi tonu lava lenei e tataua ai ona faatino lenei galuega. O le saunoaga a le sui mamalu, e moni lava i le tulaga lea o le per capita, po o le vaevaeina lea o le tatou GDP i le aofaiga o tatou tagata. O mea ia o lo o fai uma e Malo Aafaatasi i atunuu uma, aua e moni lava i le tulaga lea faapea na o le \$11,000 uma lava i tagata

uma. Ae o se fua faatatau lea e mafai ai ona faagatasi le tulaga, po o fea le maualuga. Aua o le mea lea e i ai nei, o le tele o atunuu laiti, e i ai ia latou pe na o le, pei o le mea lea e i ai tatou e \$1,000 i le tagata e toatasi, a faatele i le aofaiga ona maua lea o le tatou GDP. A o le taimi lenei, ua maualuga ua ova atu i le \$10,000 ona o le tulaga lava i lou talitonuga. Ona o le atinaeina lava o le tatou tamaoaiga ma atinae, ua tele le tulaga ua i ai. Ma o le naunautaiga lava ina ia faapea ona faatupulaia le tatou tamaoaiga maua galuega faigaluega, ola pisinisi ma tulaga faapena, o le a faapea foi ona fesoasoani ai i le tulaga o le siitia pea i luga o le tatou GDP, ma faapena foi ona faamaualuga ai le tulaga lea, le evalesi lea o le tagata e toatasi, po o le a le tulaga o le per capita GDP.

Lau Afioga ona ou faasolo atu lea i le isi vaega e pei ona fesiligia ai. Pe aisea ua ave ai na o le fesoasoani mo faletupe pisinisi, ae le afea pisinisi nonogatupe laiti. Ua uma ona ou faailoa atu le agaga o le Malo po o le tausaga talu ai, ina ia mataitu pe regulate uma ia pisinisi nonogatupe laiti ia i se taimi lata mai. Ma sa faatonuina foi le faletupe tutotonu ina ia tagai i ai i le tulaga lea, ina ia i ai se Tulafono e malupuipui ai i latou e o atu e nono mai tupe nei i tatou pisinisi laiti nei. O lea ua logo mai e le faletupe tutotonu, masalo po o le masina o Tesema i le tausaga nei, o le a faapea ona maua mai le kopi o le ata o le Tulafono Tau Faaofi, e toe tagatagai ai foi le Palemene ma tuu atu i le Komiti, ina ia faapena ona regulate ai, ia auaunaga ia a tatou kamupani ia. E pei ona silafia sa talanoa ai foi le tatou Fonotaga i le Palemene, i le tulaga lea o le faitio o tagata, e latiti ia loans, fai fai ua le mafai ona totogi, sue ave i le falepuipui. Uma le 2 masina po o le 3 masina toe aumai, e toe aumai e le faamagaloa le aitalafu, ae ua toe faaopoopo. O le tulaga lena o i latou ia the most vulnerable i o tatou nuu ma alalafaga. E tatau ona i ai se fesoasoani e puipuia ai a latou aia tatau i le tulaga o le manaomia o le tupe, ae faapena foi ona manino e pei o isi tatou faletupe.

Lau Afioga o le vaega e 4. O se fesoasoani mo e e i ai manaoga faapitoa. E pei o i latou e po le vaai...

Afioga Fuimaono Teo Samuelu Teo: Lau Afioga i le Fofoga Fetalai.

FOFOGA FETALAI: Ia faapuupuu mai.

Afioga Fuimaono Teo Samuelu Teo: Masalo o lea e le i manino lelei mai le tali a le Afioga i le Minisita, ona o au lea sa ou laga le vaega foi lele o le stimulus. Lea e matau e tai 2% lea e ave i tatou commercial banks. A o le bulk o tagata faigaluega e laititi o latou totogi, latou te faaaogaina mai ia fale ia e nono mai ai tupe, e ese mai tatou commercial banks, o lea sa ou fesiligia pe mata e oo i ai se fesoasoani i nai fale na e faamatuu ai nai nonogatupe laiti na, tai \$500, \$800 ma le tai \$1,000. Ma le agaga faaaloalo.

FOFOGA FETALAI: Sa laga e le sui usufono le mataupu lea. Tulai mai le Minisita.

Afioga Hon SILI EPA TUIOTI: Lau Afioga i le Fofoga Fetalai, e pei ona ou taua, e le mafai ona avatu tulaga ia o tului ia e ave i faletupe, ona o le tulaga e leai se regulation, e leai se Tulafono e faamaopopo ai, ae o latou uma lava ia e fai nonogatupe i finance companies ia, o lo o mafai ona agavaa uma i latou i isi mea ia o lo o avatu, faapau le eletise, faapau le tau o le vai, ma isi faamanuiaga ia e avatu i aiga i le stimulus package, lo o i ai o latou. A o le tulaga foi lea o le faapau o le tului ma mea faapena, e le mafai ona aapa atu i ai le Malo ona o le tulaga e le o i ai se puipuiga faale-tulafono, e mafai ai ona mautinoa. A avatu tului ia e faamama ai le tului, e le o manino pe mafai ona gafatia le toe lipoti mai. O le mea foi lena o lea na talosaga i le faletupe tutotonu o Samoa ina ia fai se Tulafono, ia ona mafai loa lea ona access uma i ai o tatou tagata faamanuiaga ia e i ai nei.

Lau Afioga o le isi fesili, o se fesoasoani i le au faipisinisi, mo le au faipisinisi pei o faletalimalo ma pisinisi gaosi oloa, hotels ma le au manufacturers. Ou te fiafia e faailoa atu e tele le faamama aveaga a le Malo i nei atinae, e pei ona i ai le fesoasoani e 2% e faamama avega ai i tului o aitalafu i faletupe fai pisinisi, faapisinisi mo le 3 masina. E fesoasoani e faamama avega i le eletise ma le suavai e pei ona faalauiloaina. Fesoasoani mo le au faigaluega ua leai ni galuega, unemployment subsidy ma le hospitality training lea e faapea e tataua ona fai ni aoaoga i le taimi lenei e faaoga ai le APTC ma latou. Ina ia faapea ona siitia pea le quality o le galuega. E oo i le taimi e toe lelei ai le tatou tourism ae ua faapena ona toe faafaigaluega ai i latou. Ma le faamama avega o le NPF ma le ACC e ala i moratorium faapea se vaega o le fesoasoani i le faletupe o atinae a Samoa, lea e ono maua ai ni fesoasoani mo le au faifaatoaga faapea ma faletalimalo. I le polokalame o le SAFPROM ua galulue soosoo tauau nei le Matagaluega o Faatoaga ma le Matagaluega o tupe, ma le faletupe o le lalolagi, e faamautu nisi o vaega tuua ma le faamoemoe e tataua ona amata faagasolo faalauiloa i le atunuu, aemaise le amataga o galuega a lenei poloketi, mo se manuia o atinae o faatoaga ma faigafaiva i le taimi lata mai.

O i ai foi le faafesili ua maua foi nisi o fesili ai i le polokalame o le CSSP, o lea ua faagasolo polokalame faatino mo atinae ua maea pasia, ma o lo o i ai le faamoemoe e toe faagasolo nisi faalauiloa mo atinae fou i se taimi o i luma. O lo o loma foi le iloiloga o nei polokalame ma o se avanoa lenei e faamautu ai nisi o luitau o lenei polokalame aemaise o vaega e tataua ona toe faaleleia atili o le auunaga. O lo o i ai foi se polokalame o lo o faagasolo nei, aemaise i i Vaisigano i le water i lologa, o lo o i ai le fesoasoani a le GCF. Ae o le taimi lenei e tusa ua 100 ia talosaga a pisinisi laiti i aiga ma households e fai ia latou pisinisi laiti, ia o lea ua sainia ia konekarate nei ma faamatuu atu loa tupe e fai ai latou atinae laiti. O le tasi lena fesoasoani tele

a le Malo e faatupe e le GCF. Ia ma ua fautuaina foi ia le CSSP i latou om faagaioina lea atinae ma nei galuega, ina ia faavavevave mai aemaise lava i households. O lo o i ai foi latou o faipisinisi tetele, ia o lo o tau faamanino, ia e pe toe talosaga foi latou o la ua i ai ia latou pisinisi pe le mafai ona faatino mai i le tulaga faapena. Lau Afioga o lo o tuu pea se i faatalanoa, ae o lo o tele avanoa e fai ai nai pisinisi laiti e fesoasoani ai i ai latou o lo o faapea ona afaina, i taimi o lologa ma tafega.

Sa e fesiligia foi inisiua mo Malu o le Malo, Matagaluega o Leoleo...

Afioga Sulamanaia Fetaiai Tauilili Tuivasa: Lau Afioga i le Fofoga Fetalai, sina mataupu lea sa laga e lenei sui usufono i tulaga ia i vaega ia e faamatuu mai ai fesoasoani ia e pei o CSSP ma vaega ia, ona o le talosaga foi sa tuuina atu ona o le faafaigata o tulaga ia. Masalo o lenei itumalo masalo e ova atu ma le 3 i le 4 talosaga sa tuuina mai ma teena lava. Ae o nai mea faatauavaa lava sa teena ai. Ia ma sau sau foi sa fai le tuualalo i ai i lea foi vaega o lo o vaaia, pe mafai ona faafaigofie i le, o la e aumai talosaga i lalo o Faalapotopotoga o Tina ma Tamaitai, ia po o autalavou ma afioaga foi, ia ae aumai e teena. E pei la o le talosaga lea na avatu se i silasila i le faafaigofieina o auala e fai ai..

O lea e tele fesoasoani, ae o le faigata ia o process. E le o mafai ona oo tonu lava i lalo o afioaga ma alalafaga lea, ae faafetai ua e saunoa i lea tulaga, e pei o le vaega lena. Ia faigofie ona faatino fuafuaga ina ia mafai ona ausia uma e tagata. Aua e tele fesoasoani ia e aumai, ae o le process ma le faatinoina, o le faigata ia.

Ia lau Afioga i le Minisita o Tupe, o sina fesoasoani lena.

FOFOGA FETALAI: Ia se i tulai mai le Minisita o Tupe.

Afioga Hon SILI EPA TUIOTI: Ia e tali puupuu atu i le Afioga i le sui usufono sa saunoa nei, ia e masalo o le CSSP, ia e le gata i le process ae o le tulaga lea e pei ona ou talanoa atu i fesoasoani lea e avatu i le GCF e ave i households o pisinisi laiti ma tulaga faapena, e i ai a latou criteria foi ia lea pe e te agavaa ai? Masalo o le process ia e fai muamua, ae o le tulaga ia foi lea e muamua lava siaki po o le tulaga e agavaa ia le aiga po o ai... ae o lea se i amata galuega i lea vaiaso ia ona fesili lea i le Matagaluega o le CSSP, ina ia aumaia faamatalaga ona toe logo atu lea o lau Afioga.

Ae e pei o le tulaga nei, masalo e oo i le 300 pe 400 ia pisinisi ia mo fesoasoani lea e i ai nei. Ae o la e faatoa 100 lea ua uma nei ona sainia e lou Ofisa, ia o lo o taumafai lava... o le tuai lava o le CSSP ae o le saina ia ma faaalu tupe, ina ia faaaoga e tagata i lenei taimi. O le tali atu lea i lau Afioga.

Ia o le fesiligia lea o inisiua foi o le Matagaluega o Leoleo, lau Afioga i le Fofoga Fetalai, o lo o i ai se faamanuiaga faapitoa le Special Insurance mo muaau o le Malo e aofia ai le Matagaluega o Leoleo, le Falepuipui faapea

Vaega o Tineimu. O lenei fesoasoani, e ese mai i le faamanuiaga faapitoa lea sa faalauiloa i le faamama avega i le stimulus package e pei ona i ai le \$500,000 e faavagavaga mo i latou o le aufaigaluega, e ono aafia ona o le faatinoga o galuega mo le puipuiga. O le tali puupuu lea, o lo o ua i ai foi ia le tatou inisiua o faaagaga mo mataupu e puipui ai ia a tatou leoleo ia faapea foi ia Tineimu.

E i ai nisi na fesiligia ia le tuai faatino o poloketi faatasi ai ma tatau ona tapunia polokalame ma galuega ua autausaga o tauave pea e tusi, ae ua le o toe faaogaina. E pei ona silafia ua ave le faamamafa a le Malo, le mataituina o ana atinae faatino, e aofia ai asiasiga a le Kapeneta lea ua avea nei ma vaaiga fou i polokalame o atinae uma a le Malo, ma o le a faaauau. E mataitu ma asia galuega, ina ia mautinoa le vave ona lelei faatino, e i latou o lo o nafa ma nei galuega.

Ua galulue foi ia le Matagaluega o Tupe ma paaga, o lo o faatupeina nei atinae, e tapunia ia poloketi ua le o toe faaogaina, ae o lo o tauave pea i tausaga taitasi.

O le Ofisa tuai o le Regulator sa faapea ona faaleagaina e le malaia. O lo o faatino ia suesuega masani a le Matagaluega o Tupe ma le Ofisa o Suetusi Sili, ina ia faamautinoa aseta ma meatotino a le Malo, sa faaleagaina ai. O lo o talia foi se fesootaiga o lo o faatino nei ma le Kamupani Inisiua, ina ia vave faamaea a latou sailiiliga, mo le faamoemoe e toe faaolaina mai, se vaegatupe a le Malo, e tusa o tuutuuga faainisiua.

Faigamalaga i Savaii, mo le atunuu e faatino ia faiga filifiliga mo Taitai o le atunuu ia Aperila o le tausaga fou. Lau Afioga i le Fofoga Fetalai, o lo o faatalanoaina nei e le Matagaluega o Tupe ma le Ofisa o Faiga Palota se auala talafeagai ina ia mafai ona faatino ma totogiina e le Malo lenei auaunaga, e malaga ai le atunuu e faatino le latou aiatatau e ala i le palota. E faatauaina e le Malo lenei fuafuaga ina ia aveesea ai mafauauga, a nisi e tatau ona faatino e sui tauva lenei galuega ma aafia ai i latou i le Tulafono.

Fesoasoani a le Malo e uunaia ai atinae tau faatoaga, faigafaiva faapea vaega o turisi. Lau Afioga i le Fofoga Fetalai, o lea ua afea i fesoasoani a le Malo le uunaia o atinae a le vaega o Faatoaga ma Faigafaiva. Ua amata faatalanoaina foi e le Malo ma ana paaga, e aofia ai le Faletupe Pisinisi i Faletupe ma vaega o Pisinisi, se faiga faapaaga e lagolagosua ai i taumafaiga a le Malo mo atinae tau faatoaga ma faigafaiva, lea ua i totonu o Investment Concessions a le Malo.

Mo turisi ma faletalimalo, ua ausia e le Malo ana fuafuaga mo atinae o faletalimalo, ma o lea ua i ai le faamoemoe, o le a muta lenei fesoasoani i se taimi lata mai. Mo le silafia, e faitau miliona le fesoasoani a le Malo i lenei vaega maoti i tausaga e tele, e oo mai i le taimi nei ma ua alagatau ona malosia ma tauave loa e i latou a latou atinae.

Sa fesiligia e nisi ia le faamoemoe e maua mai e le Malo se tupe maua e ala i le feafaatauaiga o aseta, Capital Gains Receipts. O le agaga ma le fuafuaga

lena a le Malo, mo le siitia o ana tupe maua. O lea ua maea ia tatou tapenaga manaomia, ma ua taoto nei i le Matagaluega o Tupe ma le Matagaluega o Tupe Maua, e faamautu ma faamaea tapenaga manaomia, a o le i tuuina mai le Tulafono i le Palemene.

Atinae lelei o Upolu, e lelei foi mo le motu tele i Salafai. E faataua pea e le Faigamalo lana anavatau lenei, ma o lea ua taoto nisi o atinae tele a le Malo e faatino i le taulaga i Salelologa. E aofia ai le fausiaina o le Ofisa fou o le NPF, fausiaina o le Ofisa Tutotonu fou o Faamasinoga, ua maea tatalaina le auala sima fou i Maliolio, ae ua amata faataoto foi le galuega o le auala mai Patamea i Vaiaata.

O lea foi e galulue le Pulega o Suavai, Pulega o Felauaiga i le Laueleele, ma le Pulega o Eletise, e toe faatulaga auaunaga mo le taulaga i Salelologa, ina ia ogatasi ma fuafuaga a le Malo, e avea le taulaga ma nofoaga e tapuvae tasi uma i ai auaunaga a le Malo, ma pisinisi mo le motu tele i Salafai.

Lau Afioga i le Fofoga Fetalai, o le vaega e sosoo ai o le vaega e ua uma ona talanoa i ai le Afioga i le Minisita o Fesootaiga...

Tofa Olo Fiti Afoa Vaai: Lau Afioga i le Fofoga Fetalai...

FOFOGA FETALAI: Malie le Minisita, tulai mai le sui usufono o Salega...

Tofa Olo Fiti Afoa Vaai: Ia, pau le mea sa ou tulai atu ai se i malolo foi la Afioga i le Minisita, ae na pau o lea ona o lea o le a see ese le Afioga i le Minisita ma tulaga ia o tupe ia sa faameaalofa mai ona o le uunaia o faatoaga ma tulaga faapena, o lea la ou te vaai atu ai i le \$13 miliona lea na faatupe mai e le World Bank i lalo o le fesoasoani a le IFAD.

Ae e i ai la le \$20 miliona Amerika lea masalo po o le \$70 miliona lea na sau ai i le polokalame lea, e faatupe e le World Bank i lalo o le fesoasoani a le ID Aid. Ia ae o lea ou te le o vaai atu ai i totonu o le tatou Tala o le Tupe po o fea se mea o agai i ai sina mea tele po o le mea o lea. A faapea ua faatumu ai ia le tatou deficit lea e vevesi ai, ia e le afaina lena mea. E pau le mea ou te tilotilo atu ai i le faaaogaina o le tupe lea, e \$20 miliona Amerika lea, e agai tonu lava i le aufaifaatoaga ma le aufaifaiva.

E oo lava i nai loomatutua foi ia e fagotaina le gataifale, le aloalo, o lea e maoti lelei i lalo i i le tupe lea, o le ave i ai o se tupe. Ia o la e faafogafoga mai ia nai loomatutua, nai tuisse ma le eli tugane, po ua oo atu se tupe i le \$20 miliona Amerika lea?

Afioga Hon SILI EPA TUIOTI: Lau Afioga i le Fofoga Fetalai..

FOFOGA FETALAI: Ia, mo le faasaoina o le taimi a lau Afioga i le Minisita o Tupe, o lo o tulai mai foi ia le isi faaauilavea. O Faleata, se i..

Tofa Lealailepule Rimoni Aiafi: Faafetai lava i lau Afioga, e ese lau mataupu o le mataupu a le Afioga, o le a see ese le Afioga i le Minisita i le vaega lea tau turisi.

O le mea taua i lau faalogologo i lenei taeao lau Afioga, manatua sa faamamafa lau lauga i le mea lea o ni tupe fou. Manaomia ni tupe e fesoasoani i lenei taimi. O lea ua saunoa manino le Minisita, e le manaomia ni tatou loans. Faafetai, toe leai ni loans fou.

Lau Afioga i le Minisita, o lea faatoa uma nei lava ona saunoa, 10% e faalaitiiti ai ia tatou tupe maua. O lona uiga e \$71 miliona le tupe lea e faamoemoe e pau ai le tatou tupe maua. O le ala lea o le tatalo atu i lau Afioga, se i tagatagai lelei i vaega ia. E sao e moni lava au e mo mea o faletalimalo, ia ae manatua foi lau Afioga, o lea lava e faamamafa e lo tatou Malo, e taua. Na uma le misela toe sosoo ma le tulaga nei e i ai, ia e tagai lelei ane i ai.

Sa matou feiloai ma le Afioga i le Minisita o le EPC ananafi, matou ma nisi foi... e matou o atu ua oi si toeaia, oka mo talosaga la e i luma o ia. E moni lava ia i lenei taimi. E le o ni taimi faigofie. Ia ae e tataua ona galulue faatasi ma le Ofisa o Tupe, i vaega ia, ina ia fesoasoani le isi Matagaluega i le isi Matagaluega ma le Malo, i lenei vaitaimi aua o lea e vaai atu, matua lelei lava ia le tulaga o tatou aitalafu lea e i ai aua o lea e fai mai e le o manaomia ni a tatou aitalafu e na o le 44% lea e i ai, o lea toe 6% e le i taitai oo i le 50%, ma le faaaloalo lava, faafetai.

FOFOGA FETALAI: Se i tulai mai le Minisita o Tupe.

Afioga Hon SILI EPA TUIOTI: Faafetai i lau Afioga. O le tulaga lea o le tupe lea e aumai i le World Bank, ma le IFAD, o le tupe lea e tatou te talanoa ai i le poloketi lea o le SAFPRO. E momoli foi le faafetai i le World Bank ma le IFAD ona o le tulaga foi lea ua faalauteleina ia tulaga ia, o aso ia ua ese mai i le SACEP. Ae ua maua avanoa mo le fisheries ua faaopoopo i ai. Ia ma tulaga foi ia o faatoaga, e le o ni faatoaga laiti, ia ma tulaga faapena, ia ae masalo o se taimi ona toe faalauiloa lea o tulaga ia, ona o le taimi nei foi e i ai nisi e tataua ona omai e fesoasoani, ia ae ua le mafai ona malaga mai, ia nisi e galulue faatasi ma tatou, ia talu ai o le tulaga o le tapunia ia le tatou atunuu. Ia ae onosai ua le o toe umi o lea ua tapenapena foi i ai le Afioga i le Minisita, ia atonu o le a tali atu ai o ia i le faafesili.

Ia o le tulaga e pei ona taua aitalafu, mo le taimi lenei, e pei o le tulaga lea se i tatou matau e pei o le faamuamua lava se i o tatou fai se galuega i le Covid-19 ma le aafiaga ai o le tatou tamaoaiga, faapea foi ia le...

Tofa Olo Fiti Afoa Vaai: Lau Afioga i le Fofoga Fetalai, faamalulu atu lava i si ou uso a Minisita. O le mataupu lea na ou laga atua, e pei ona o lea

ou te le o vaai i totonu o le Tala o le Tupe i le grant lea, o lea ou te fia malamalama ai pe aisea ua le i totonu o le Paketi? Le \$70 miliona lea na aumai i le ID Aid. Aua o lea na approve faatasi lava ia le fund lea \$20 miliona Amerika ma le \$3.6 million US lea la lea e aumai nei i totonu. Lea e i totonu o le Tala o le Tupe lea e faatupe ai mea o le Ofisa o Faatoaga. Ia faamolemole lau Afioga.

FOFOGA FETALAI: O lea ua maua atu ia... Ia se i tulai mai ia le Taitaifono o le Komiti o Tupe. O sao ea lenei faaaliga o tulai mai ai le sui usufono o Salega?

Afioga Aliimalemanu Alofa Tuuau (Alataua Sisifo): Lau Afioga i le Fofoga Fetalai ou te fia fesili i le sui usufono o Salega po o fea e oso mai ai le \$70 miliona ID Aid lea e taua? Ae o le mea lea e fia fesoasoani atu i ai, a aumai mo mea o fesoasoani faapea, e le faapea e pei ona taua e fia ea \$100 miliona lea na ou faalogo atu o tau. E le faapea o le a aumai tuu atoa uma i le tausaga e tasi. E fuafua i galuega e mafai ona faatino, i le 12 masina. O lau fesoasoani atu lena lau Afioga.

FOFOGA FETALAI: Ia, o lea la ua...

Tofa Olo Fiti Afoa Vaai: Lau Afioga i le Fofoga Fetalai...

FOFOGA FETALAI: O le tali lena lau Afioga.

Tofa Olo Fiti Afoa Vaai: E sao o lea ua tali mai, ae faatu mai se lafo e...

FOFOGA FETALAI: Ia o lena lava e te silafia le tali ae e te fesili lava?

Tofa Olo Fiti Afoa Vaai: Faatu mai se lafo, leaga o le aso 2 o Iulai 2019 na approve ai tupe ia e lua, grants ia e lua mai le World Bank. Ae faatu mai se lafo e avatu tou te silasila ai.

FOFOGA FETALAI: Ia, faaauau le saunoaga a lau Afioga i le Minisita o Tupe.

Afioga Hon SILI EPA TUIOTI: Lau Afioga i le Fofoga Fetalai, e leai, o le tupe lea e le faapea o le a aumai atoa. O le tupe lea ua muamua mai e \$11 miliona lea ua i totonu o le Tala o le Tupe ma faamaumauga, ia e amata ai le galuega, ae e le faapea o le a aumai atoa le tupe, ia o lea ua i ai i totonu, o lea ua uma ona approve. E tele tausaga o le atinae lenei. Ma e pei foi ona taua, e leai se mea e faamaoni lava le faamauina o a tatou Tala o Tupe ma tulaga faapena i aitalafu.

FOFOGA FETALAI: Ia faaauau le saunoaga.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai.

FOFOGA FETALAI: Se i tulai mai le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: E na o le pau lava le mea na ona ou faamanatu atu i le sui usufono mo Salega, e silia ma le toeitiiti lava atoa le 3 vaiaso ua uma ona taoto le lauga, taoto le Tala o le Tupe a o lenei lava e tau fesili. A o le mea lena a le sui usufono sa tataua ona alu e vaavaai ma e le toe tau fesili ai. O le sui usufono foi e le o se sui usufono fou, o le sui usufono ua leva. Ae lelei ona faitau lelei le Tala o le Tupe ma silasila i ai nai lo le tu soo i luga ma aumai ana fesili faapaitau.

FOFOGA FETALAI: Ia se i...

Tofa Olo Fiti Afoa Vaai: Lau Afioga i le Fofoga Fetalai, o le a ma le finau. Leai, na pau lava le mea na ou fesili ai, aisea ua le aumaia ai le tupe lea i totonu o le, a na ou faitau atu o lea e i ai, e le taitai lava ona ou fesili.

FOFOGA FETALAI: Ia, o lena ua e nofo lava oe ma fai le tali.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: O lena ua uma ona tali le Taitaifono o le Komiti o Tupe, a o le faalavelave lava lea o le sui usufono lea, e le fia faalogo i le Taitaifono o le Komiti o Tupe.

FOFOGA FETALAI: Ia, tulai mai le Minisita e faaauau le saunoaga.

Tofa Hon Lopao Natanielu Mua (Minisita mo Faatoaga ma Faigafaiva): Lau Afioga i le Fofoga Fetalai, ua ou fia tu atu lava leaga o... lea e i totonu o le Tala o le Tupe lau Afioga le \$11 miliona o le tausaga lenei lea e i totonu o le, a silasila i le page muamua lava o le breakdown o le budget a le Agriculture, o lena e i ai le \$11 miliona o le SAFPROM lau Afioga ma le faaloalo.

FOFOGA FETALAI: O le itulau e 11 lena e i ai.

Tofa Olo Fiti Afoa Vaai: Faafetai, o le isi tupe lena mai le IFAD, ae o le IDA lea ou te talanoa atu ai. O le IFAD lena e te talanoa mai ai ae o le \$20 miliona mai le IDA, lea ou te fesiligia a lea e te saina ai, lau Afioga na e talosaga i le mea lea. Lea e te saina ai. Ae faatu mai lau lafo e avatu.

Tofa Hon Lopao Natanielu Mua: Leai lau Afioga na ona ou fai atu le mea lea e i ai le \$11 miliona lea na saunoa ai le Afioga i le... Ma e sao foi le Afioga i le Taitaifono o le Komiti foi o... e le faapea o le a faaoga uma na tupe i le tausaga e tasi lau Afioga.

O lena foi ua leva ona e i le Palemene, e tatau foi ona e silafia lena mea, ma le faaaloalo.

FOFOGA FETALAI: Ia, malo. Tulai mai le sui usufono, Minisita o Tupe po o ua maea lau saunoaga? O lea foi ua fetai ma le taimi e uma ai le tatou galuega, aua e...

Afioga Hon SILI EPA TUIOTI: Lau Afioga o le a faauma atu.

FOFOGA FETALAI: Mo lou silafia, se e te fiu lava e faamalamalama ia le sui usufono e le fia malamalama, e le fia malamalama lava.

Afioga Sulamanaia Fetaiai Tauiliili Tuivasa: Lau Afioga i le Fofoga Fetalai e le...

FOFOGA FETALAI: O la e silafia e Olo ae o la e manao lava e toso le tatou Fono.

Afioga Sulamanaia Fetaiai Tauiliili Tuivasa: Lau Afioga i le Fofoga Fetalai, o le fia faasaoina o le taimi o le Afioga i le Minisita, ia ona o lea e pei e matau atu o le a lamalama faaiu lana saunoaga. Ae sa i ai le talosaga a lenei itumalo i nai tagata foi na e le atoatoa le tino ma le mafaufau, mai e na o le oo lava... na ona taua ae uma loa.

Ae po o le a se tulaga o la e faalogologo foi, o le tele o sui o lenei itumalo e i ai manaoga faapitoa, e le o mafai ona ausia tulaga ia e faapea 55, po o le tulaga 65, ia ae po o i ai se faamanuiaga a lau Afioga i le Minisita o Tupe i lea vaega?

Afioga Hon SILI EPA TUIOTI: Lau Afioga Fetalai, ia ua uma ona i ai ia faamanuiaga nei. E pei foi ona silafia sa i ai le vaega foi ia sa vaevae o Mapuifagalele, o le ADRA ia ma latou uma ia e i nei, e manaomia ona i ai ni faalapotopotoga, i tulaga foi ia po o le ADRA ma faapena, ia mafai ona auala atu ai vaegatupe ia mo latou o manaomia le fesoasoani. E le mafai ona tuusao atu i aiga sei vagana ua i ai se Pulega, e mafai ona talia ma tufa, ia

ma toe tusi mai ia ni faamaumauga e faamaonia ai, o lea ua uma ona foai atu ia le...

Manatua lea na i ai lea sa faaeese ai le \$200 ina ia faaagaga mo i latou. E oo mai i le taimi nei, e le o mafai ona avatu i ai, ona o le tulaga lea e le o i lalo o ni faalapotopotoga foi ia maoti e mafai ona latou faatinoina le auaunaga. Ae o le naunau latou o lea ua avatu, ua i ai le tupe. Ia ae o lo o faatali i le tulaga lena o tatou process leaga e tataua lava ona fai ma accountable i tupe ia ua tuu atu, ma le faaaloalo lava.

FOFOGA FETALAI: Ia se i tulai mai le Taitai o le Malo.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaioi: Lau Afioga ae e le i faaiuina le saunoaga a le Minisita o Tupe, e na o le pau lava si au faasilasilaga, o lea ou te umia le lipoti lea a le NPF tausaga e 2019, tausaga talu ai. Lea e aumai iinei ona tauaaoina lea e le Palemene. Ia ma agai atu loa i o i le Komiti e latou te silasila i ai pe i ai foi ni mataupu e laga e latou.

O totonu la o le lipoti lea faa-tausaga ua uma ona sue ma ou te faamalo i le Faalapotopotoga a le NPF ona o lea ua faafogafoga mai e pei foi ona saunoa le Taitaifono o Komiti o Tupe i le tulaga maoae lea ua i ai nei ia Faalapotopotoga a le Malo ma Kamupani a le Malo, o le vave ona saunia o a latou lipoti faaletausaga ma aumai loa ma faataoto i totonu o le Palemene, ma alu atu ai loa i o i le Komiti, latou te susesuea.

Ma o lea la e aumai manino i le lipoti lea a le NPF ia le vaega tonu lea e faaoga i ai ia tupe nei a le NPF, mo le nonoina atu. O lo o aumaia ai le faaupuga, i le fuaiupu muamua lava, o le vaegatupe lenei a nono atu, e nono i luga o taiala ua uma ona faataoto, ina ia oo i le ooooga ina ia maua mai seleni, mai so o se o le a le atinae, ia lava le seleni e toe foi mai, ina ia maua ai pea ia seleni nei a le aufaisao ma faia ai loa le faasoia mai lea tausaga i lea tausaga.

O lo o aumaia ai le kalafa lea lapotopoto, e faapea le faaupuga, o le aofaiga atoatoa o le portfolio lenei po o tupe nei nono atu, e \$736 miliona, Ma e o le vaevaeina o lea foi e faasolo mai i, e i ai le vaega e vaevae, i nonogatupe tetele. O lona uiga o nonogatupe ia mo pisinisi, nonogatupe e pupuu taimi e totogi ai. Nonogatupe e faasafua atu i sui ma fesoasoani eseese e latou te faia, ma o lea e aumai uma lava i totonu i le lipoti lea faamatalaga, o tupe sa nono atu, i small loans, short term o lona uiga o nai nonogatupe laiti o short term, o nonogatupe e vave ona toe totogi. Investment loans, loans tetele ia, o lea e lisi uma mai lava i i \$241 miliona mo small loans, loans ia mo nonogatupe laiti, o short term, o nonogatupe ia e vave ona toe totogi \$36 miliona, Investment loans, nonogatupe ia ia, lea sa laga ai fesili, e \$189 miliona i le tausaga lea e faaiuina ia Iuni 2019. Ae tausaga talu ai, e \$163 miliona.

Lau Afioga i le Fofoga Fetalai, ou te le i soona tu atu la i se palafu. Na ou tu atu i tulaga masani ia, i faaiuga uma o tausaga e aumai ai lipoti a le NPF i totonu i i ma faatulaga mai ai ia nonogatupe lea ma lea ma lea, ona avatu ai lea i o latou te suesueina i totonu o le Komiti.

Ia o le uiga tonu lena ona o le sui usufono foi sa tulai mai, ma o le mea moni lava, afai lava sa le talia sata loan, aua le aumai i totonu au mea tau lava ia te oe. O le mea lena e i ai mafuaaga, e tataua ona faautagia, e mulimulitai lava le Faalapotopotoga, i a latou Tulafono, ina ia faaeteete i le mea lea, o le fai o le nonogatupe ae gau atu ai ma tupe a tagata aufaisaofaga, e tua i ai aemaise o taimi faapenei lau Afioga i le Fofoga Fetalai.

O lou tulai atu lena ona o lea sa siisii lou leo, leaga o le sui usufono e pei e logonoa, ina ia ona silafia ai, ou te le i soona tu atu, e i ai mafuaaga na ou tulai atu ai.

Lau Afioga i le Fofoga Fetalai, ia e faamalo i le Minisita foi i le tele o le mau lavelave, sa feagai ma ia. O le ala lena, o lea ua matua sauni lava le Kapeneta, e matua tali uma lava fesili na aumai, ina ia maioio lelei, ma malamalama le Maota nei.

FOFOGA FETALAI: Malo, faafetai.

Susuga Hon Laauli Polataivao Leuatea: Lau Afioga i le Fofoga Fetalai...

FOFOGA FETALAI: Ne i te i ua toe fesiligia, le tulaga lea sa e fesiligia o lea ua faamalamalama e le Palemia...

Susuga Hon Laauli Polataivao Leuatea: E i ai si mea laitiiti lava lea...leaga o lea ua, e le agai i le Palemia lau mataupu o le Afioga i le Minisita Tupe o lea o le a faaiuiu lana saunoaga malie lava lau Afioga i le Minisita o Tupe, ia o le a taoto ia nisi manatu na avatu. O le a taoto le deficit, ia ma le gau, ma isi mea uma na o ta fai atu ai o lea ua manino lau saunoaga, ae o le a tatou o ia i le tupe pau.

O i lea e tau faamaninoa atu ai, o le a lafo atu le faalagolagomaga i lau Afioga i le Minisita ma le talitonuga, ia o lea ua e saunoa manino e mafai ona ao ia tatou tupe ia. O lea foi le tuualalo i a tatou tupe faaalu e pei o le lagona lena lau Afioga. O si mea laitiiti lena na ona ou faatepa, ia o le agaga lena sa tau avatu ai le...

FOFOGA FETALAI: Ia lau Afioga i le sui usufono mo Gagaifomaua Nu.3, ia o lea ua uma lo tatou taimi...

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: O le mea lena na ou tulai

atu ai ona ua fai lau faatonuga, ma ou tulai atu ai e faaiu mai loa le saunoaga a le Minisita. O lea la ua faaiu le saunoaga a le Malo, ia ma ou tulai atu ai i si tamai mea lava lea, ae o lea foi ua ou vaai atu ua toe tu tu mai, ae o lea ua pau le Afioga mai le laulau.

FOFOGA FETALAI: Malie le sui usufono mo Gagaifomauga Nu.3...

Susuga Hon Laauli Polataivao Leuatea: Ioe, lau Afioga i le Fofoga Fetalai...

FOFOGA FETALAI: Malie le sui usufono, o le sailiili masei o le faauo lava na i le tiapolo. Ia o le a e toe taumafai e toe alo i tua lo tatou vaa, a lea ua oo i le taimi tatou te manava ai. A lea o le a e toe alo i tua le tatou vaa...

Susuga Hon Laauli Polataivao Leuatea: Se e malie lau Afioga o lata fesili na fai nei, o le Minisita o Tupe e le i tali maia...

FOFOGA FETALAI: Malie le sui usufono, ua uma ona faamalamalama ia

Susuga Hon Laauli Polataivao Leuatea: O Faiga Faavae fou lea sa ou momoli i le Afioga i le Minisita o Tupe...

FOFOGA FETALAI: Ua maea ona faamalamalama le itu lea

Susuga Hon Laauli Polataivao Leuatea: O le a faia ia o lea lau Afioga. Faafetai mo le avanoa.

FOFOGA FETALAI: O le a tatou toe o, o lona uiga o le a foi e toe faamalamalama atili ma toe faamalamalama atili...

Susuga Hon Laauli Polataivao Leuatea: E le o se sailiili masei lau Afioga i le Fofoga Fetalai, o le mea lena e fia tulai atu. O le agaga sa tau avatu le tuualalo i le Minisita o Tupe, ae faafetai.

FOFOGA FETALAI: Malie le... faamolemole... O lea ua ou faamolemole atu, ioe, e ese le agaga o le tatou galuega, e fai fuafua mai foi i le Fofoga Fetalai ia ma lana fesoasoani atu. Aua o le isi e toe fesili mai lava i lau saunoaga, e ui i lea, o le a ou le manatu e aumai i luma. A o le tatou galuega e faapena, a maea ona faamalamalama, aua o le isi lea finagalo o le Malo lea e i ai, e faamalamalama se mea o la e faatoa laga mai, o le upu e to, o le gutu ma le afi, e faasao le uamaea o la e vevela. O le taimi lava e laga mai, tu atu le Malo faasao, aua le faafofoga mai a le atunuu ia malamalama.

A o lea o le a toe alo i tua, o le a tatou toe o foi, o le isi aso atoa e fai ai le mataupu lea a ua uma ona faamalamalama e pei foi o le mataupu lea sa laga mai e le Vaimauga ia i latou e le atoatoa le malosi. A lena e i ai le tai \$50 e tusa pe a alu atu le tusigaigoa? E lavevea uma ai lava, ioe. E faigofie lava. Ae malie lau Afioga i le Minisita o Tupe, tulai maia e faaiu mai lau saunoaga ae faaiu le tatou galuega.

Afioga Hon SILI EPA TUIOTI: Faafetai tele i lau Afioga. O lea o lea o le a faaiu atu lau Afioga i le Fofoga Fetalai.

Ae le i faamaeaina se tautalaga, ou te fia faafetai foi i le tapuaiga mamalu a si ou itumalo Faasaleleaga Nu.1 i Sasae i la outou tapuaiga; i le afifio o Tia ma Luamanuvae ma Tinousi, susu le malelega a Malietoa, susu Sua o le Maopu o Nafanua ma le aiga, lau tofa i le Tuua, e te tausivaatele aua le Falefia ma le Falesalafai, Lologapule ma le Faitoaga, e laveimanino toe laveiaava.

Tainane foi le afioaga o Tafua aua le afio o le Taufaaasisina ma le Alaalamatuatala, afifio Tapaau, alaالاتا Ulu ma Lemaota, ma le mamalu i le toiloto. Ou te fia faafetai foi i le aufaigaluega a le Atua o lo o outou asuina le ipuvai o le ola i totonu o si o tatou itumalo. Ou te talitonu o la outou tatalo ma la outou tapuaiga mamalu ua ae manuia ai faiva o la outou auauna i le tautuaina o le tatou Malo aemaise o lo outou paia ma lo outou mamalu o si ou itumalo faapelepeleina. Ia saga faamanuia pea le Atua i la outou tapuaiga mamalu. Sau se aso feiloai foi i le agalelei o le Atua.

Faafetai i lau Afioga i le Fofoga Fetalai mo lou avanoa, faamanuia le Atua pulepuletelete i lau Afioga. Faamanuia le Atua i le Afioga i le Palemia ma le Kapeneta, faapea le Fonousu a Samoa aemaise Samoa atoa. Soifua.

FOFOGA FETALAI: Malo faafetai. E le taufaafuluina, ae malo faafetai le saunoa manino ma faamalamalama. E leai e faapena. O le galuega lava latou e anoanoai tiute ma faiva, ae faamoemoe lava i le Atua e fesoasoani mai ina ia faapena ona maua se Samoa saogalemu ma ia manuia le atunuu i le tatou galuega o lo o fai nei.

Ia, ona o lea ua tatou taunuu i le tatou taimi e manava ai le tatou galuega i lenei aso, ou te tapa le sui usufono mo Safata, le Afioga ia Leana mo se tatalo e faaiu ai le tatou galuega.

Na tolopo Galuega a le Fono Aoao Faitulafono i le itula e 1:11 i le afiafi seia aulia le itula e 9:00 i le taeao o le Aso Lulu, 24 Iuni 2020.

